

四庫全書

史部

欽定四庫全書

史部

滇考卷下

詳校官監察御史臣劉芬

編修臣裴謙覆勘

總校官知縣臣楊懋珩

校對官中書臣高中

賸錄監生臣張元功

欽定四庫全書

滇考卷下

刑部侍郎馮甦撰

元世祖平雲南

古有天下者皆最後始開滇惟元起西北其得雲南也在未有天下之先史稱元憲宗三年議征西南彝烏蠻白蠻鬼蠻諸國乃命太弟呼必賚專征以烏蘭哈達總督軍事秋七月丙午禡牙西行八月次臨洮遣額埒斯

王君侯王鑑諭大理不果行三年九月次圖喇分三道以進大將烏蘭哈達率西道兵由晏當路諸王察罕伊兆爾率東道兵由白蠻太弟由中道乙巳至滿陀城留輜重十月丙午過大渡河又經行山谷二千餘里至金沙江乘革囊及筏以渡摩沙蠻主迎降其地在大理北四百餘里十一月辛卯復遣額呼斯等使大理丁酉師至白蠻打郭寨其主將出降其姪堅壁拒守攻拔殺之不及其民庚子次三甸辛丑白蠻送欵十二月丙辰軍

薄大理城大理國主段興智微弱國事皆決於相高泰
祥屢戰不勝時東路兵亦至皆登點蒼山視城中城中
大懼泰祥徵兵三十七部有來援者皆為元兵阻敗始
與興智謀出避外郡圖興復興智奔善闡泰祥奔統矢
命大將伊克及巴圖爾追之先是詞臣姚樞從征至察
遜諾爾因夜宴為太弟言宋曹彬下江南不殺一人市
不易肆明日太弟據鞍呼曰汝昨夕言曹彬不殺吾能
為之樞即馬上賀曰聖人之心神明如此生民之幸有

國之福也至是太弟以大理拒命將屠其城樞復與劉秉忠張文謙力諫曰拒命高泰祥耳其民何罪太弟乃命樞裂帛為旗書止殺之令分號於衆兵入大理人民安堵如無兵者太弟曰城破而我使不出計必死矣已未西道兵亦至命姚樞等搜訪圖籍乃得三使戶既瘞命樞為文祭之辛酉南出龍尾城次趙贍癸亥獲高泰祥於姚州欲官之不屈因斬之而用其子高瓊高長壽等明年春太弟班師留烏蘭哈達經略雲南地哈達率

衆攻合刺章水城屠之前次羅部府大酋高昇集諸部
兵拒戰又大破之進至善闡興智率衆固守城際滇池
三面皆水既險且堅哈達選驍勇以砲摧北門縱火攻
之皆不克乃大震鼓鉦進而作作而止使不知所為如
是者七日伺其困乏夜五鼓遣子阿珠潛師躍入亂砍
之遂大潰至昆澤段興智及其渠帥馬合刺昔皆降餘
衆依阻山谷者分命裨將伊埒圖巴約特章等掩其左右
圍既合哈達與阿珠率善射者二百騎四面進擊又攻

纖寨拔之至乾德哥城哈達病委軍事於阿珠環城立
砲以草填塹衆軍始集阿珠已率所部搏戰城上城遂
破明年哈達又率師平烏蠻諸郡凡出師三年平大理
五城八府四郡烏白等蠻三十七部兵威所加無不欵
服歲丁巳元憲宗六年即宋理宗之寶佑五年也烏蘭
哈達以雲南平獻捷并請依漢故事以西南夷悉為郡
縣從之授哈達銀印加大元帥還鎮大理以劉時中為
宣撫使赦段興智使領諸蠻從哈達征交趾屠其城經

車里所部悉降之於蠻部三十六路四十八甸皆設土
官管轄以大理金齒都元帥府總之又三年太弟即位
是為世祖至元元年爨蠻舍利畏者倡言蒙古處北吾
等處南聲教所不及何以服從之時都元帥布呼丹又
專制不善撫輯於是東方諸爨部竝起應之衆至三十
萬世祖聞變命總管信苴日與大將合兵討之衆皆解
散惟舍利畏遁入巖箐未獲四年以皇子和克齊為雲
南王出鎮其地八年分大理三十七部為南北中三路

十年始置雲南行中書省於善闡以薩達克齊沙木斯廸音為
平章政事十一年命雲南宣慰司與都元帥府竝聽行
省平章節制置郡縣尹長選廉能者任之是年舍利畏
伏誅十三年更定諸路名號改善闡為中慶路即今會
城也凡為路三十有七府二屬府三州五十四縣四十
七戶百二十八萬七千有奇而滇始復入中國版圖被
教化矣

薩達克齊張立道父子政績

薩達克齊沙木斯廸音一名烏瑪喇回人其國稱薩達克齊猶言貴族也宿衛元太祖以薩達克齊呼之而不名世祖時官至中書平章政事張立道字顯卿陳留人年十七即宿衛元世祖未嘗去左右至元四年皇子和克齊為雲南王以立道為王府文學立道勸王務農以厚民即署立道勸農官兼領屯田事佩銀符尋與侍郎寧端甫使安南定歲貢之禮八年雲南都元帥布呼丹專制歲久忌和克齊來為王設宴毒之賂王府官無泄其事立道

聞之趨入閣人拒之立道怒與爭王聞其聲使人召立道入引其手使探口中肉已腐矣是夕王薨布呼丹遂據王座使人諷王妃索王印立道潛結義士得十三人約共討賊刺臂血和金屑飲之推一人走京師告變事頗露布呼丹乃囚立道大臣提舉張忠者燕人也於立道為族兄結壯士夜劫諸獄出之共亡至土蕃界遇帝所遣御史大夫博爾歡尚書拜特穆爾與告變人俱來遂與立道等還和克齊聞之密以金鬻賂博爾歡於道

祈勿究其事博爾歡遜詞謝之既至按布呼丹及王府
官嘗受賂者皆伏誅有旨召立道等入朝問王薨時狀
帝聞立道言泣數行下歔欷久之曰汝等為我家事甚
勞苦今欲事朕乎事太子乎事安西王乎惟汝意所向
立道等奏願留事陛下於是賜立道金五十兩以旌其
忠張忠等亦皆授官有差是年復使安南宣建國號詔
立道並黑水跨雲南以至其國歲貢之禮遂定十年三
月領大司農事中書以立道熟於雲南奏授大理等處

巡行勸農使佩金符十一年世祖謂薩達克齊曰雲南朕嘗親臨比因委任失宜使遠人不安欲選謹厚者撫治之無如卿者薩達克齊拜受命退朝即訪求知雲南地理者畫其山川城郭驛舍軍屯夷險遠近為圖以進帝大悅令薩達克齊行省雲南統哈喇章鴨赤赤科金齒茶罕章諸蠻賜銀二萬五千兩鈔五百錠時宗王圖固勒方鎮雲南惑於左右之言以薩達克齊至必奪其權具甲兵以為備薩達克齊聞之乃遣其子尼雅斯拉廸音先至王所

請曰天子以雲南守者非人致諸國背叛故命臣來安集之且戒以至境當即加撫循今未敢專願王遣一人來共議王聞遽罵其下曰吾幾為汝輩所誤明日遣親臣二人至薩達克齊問以何禮見對曰吾等與尼雅斯拉廸音偕來視猶兄弟也請用子禮見皆以名馬為贊拜跪甚恭觀者大駭乃設宴陳所賜金寶飲器酒罷盡以與之二人大喜過望明日來謝語之曰二君雖為宗王親臣未有名爵不可以議國事欲各授君行省斷事官以未

見王未敢擅授令一人還先稟王王大悅由是政令一
聽薩達克齊所為十二年奏雲南諸夷未附者尚多今擬
宣慰司兼行元帥府事並聽行省節制又奏哈刺章雲
南壤地均也而州縣皆以萬戶千戶主之宜改置令長
並從之十三年以所改雲南郡縣上聞先是雲南有昆
明池環五百餘里夏潦暴至必冒城郭張立道為勸農
使求水所自出役丁夫二千人洩之得壤地萬餘頃皆
為良田饗僰之人雖知蠶桑而未得其法立道始教之

飼養收利十倍於舊諸山蠻慕之相率來降收其地悉
為郡縣薩達克齊表言於朝有旨進官以褒之十五年除
立道中慶路總管佩虎符雲南未知尊孔子祀王逸少
為先師立道言於薩達克齊首建孔子廟置學舍擇蜀士
之賢者為弟子師歲時率諸生行釋菜禮由是入習禮
讓矣民俗以貝代錢初行鈔法不便薩達克齊請仍其舊
患山路險遠盜賊出沒為行者病相地置鎮每鎮設土
酋吏一人百夫長一人往來者或值劫掠則罪及之而

道俗以寧五月詔烏蒙路立驛治道聽薩達克齊節制有
土吏怨薩達克齊不已用者至京誣其專僭帝曰薩達克齊
憂國愛民朕洞知之此輩何敢相誣即命械送薩達克齊
治之既至脫其械且諭之曰若未知上以便宜命我耳
今不汝罪且命汝以官能竭忠自贖乎皆叩謝曰誓以
死報時交趾叛服不常湖廣省發兵屢征不利薩達克齊
遣人諭以逆順禍福且約為兄弟交趾王大喜親至雲
南薩達克齊郊迎待以賓禮遂乞永為藩臣蘿葉甸叛徃

征之有憂色從者問故薩達克齊曰吾非憂出征也憂汝
曾冒鋒鏑不幸以無辜而死又憂汝曾劫掠平民使不
聊生及民叛則又從而征之耳師次蘿槧城三日不降
諸將請攻之薩達克齊不可遣使以理論之蘿槧主曰謹
奉命越三日又不降諸將奮勇請進兵薩達克齊又不可
俄而將卒有乘城進攻者薩達克齊大怒遽鳴金止之召
萬戶叱責之曰天子命我安撫雲南未嘗命以殺戮也
無主將命而擅攻於軍法當誅命左右縛之諸將叩首

請俟城下之日從事蘿槺主聞之曰平章寬仁如此吾拒命不祥乃舉國出降將卒亦釋不誅由是西南諸彝翕然歎附酋長每來見例有所獻納薩達克齊悉分賜從官或以給貧民秋毫無所私為酒食勞酋長製衣冠襪履易其卉服草履酋皆感悅薩達克齊居雲南六年至元十六年卒年六十九百姓巷哭葬鄯闡北門交趾王遣使者十二人齊經為文致祭其辭有生我育我慈父慈母之語使者號泣震野帝思薩達克齊之功詔雲南省臣

盡守薩達克齊成規不得輒改薩達克齊五子長即尼雅斯
拉廸音初為雲南路宣慰使都元帥後改帥大理十七年將
大理軍抵金齒蒲縹曲蠟緬國界內招忙木巨木禿等
寨三百籍戶十一萬餘定賦租立站遞軍還獻馴象授
雲南行中書省左丞尋遷右丞建言三事其一謂雲南
省規措所造金薄貿易病民宜罷其一謂雲南宣慰司
已奏罷而元帥府尚存行省既兼領軍民元帥府亦在
所當罷其一謂雲南官員子弟入質達官當遣餘宜罷

俱從之是年張立道入朝力請於帝以雲南王子額森
特穆爾襲王爵遂命立道為臨安廣西道宣撫兼管軍
招討使仍佩虎符陞辭賜以弓矢衣服鞍馬始赴任會
永泥路大首領必思反扇動諸蠻夷亟發兵討之拔其
城邑鼓行而前徇金齒甸七十城越麻甸抵可蒲皆下
之有遺以駒象金鳳異物者悉獻諸朝二十二年又籍
兩江儂士貴岑從毅李維屏所部戶二十五萬有奇以
其籍歸有司遷軍民宣撫使復創廟學於建水路書清

白之訓於公廨以警貪墨風化大行入朝值權臣用事
遂退散地二十七年安南國復拒命討之失利帝怒欲
再發兵丞相旺扎勒平章布呼密言蠻夷小邦不足以勞
中國張立道嘗再使安南有功今復使往宜無不奉命
帝召至香殿諭之曰小國不恭今遣汝往諭朕意宜盡
乃心立道對曰君父之命雖蹈水火不敢辭臣愚恐不
足專任乞重臣一人與俱臣為之副帝曰卿朕腹心臣
使一人居卿上必敗卿謀遂授禮部尚書佩三珠虎符

賜衣段金鞍弓矢以行至安南界謂郊勞者曰語爾世子當出郭迎詔日燁乃率其屬焚香伏謁道左既抵府日燁拜跪聽詔如禮立道傳上命數其罪為書曉之日燁曰比三世辱公使公大國之卿小國之師也何以教我立道曰昔鎮南王奉詞致討汝非能勝之也由其不用嚮導率衆深入不見一人遲疑而還曾未出險風雨驟至弓矢盡壞衆不戰而自潰天子亦既知之汝所恃者山海之險瘴癘之惡耳且雲南與嶺南之人習俗同

而技力等今發而用之繼以北方之勁卒汝復能抗哉
汝戰不利不過遁入海中島夷乘釁必來寇抄汝汝食
少不能支必為彼屈汝為其臣孰若為天子臣乎今海
上諸彝歲貢於汝者亦畏我大國之爾與也聖天子有
德於汝甚厚前年之師殊非上意邊將讒汝爾汝曾不
悟不能遣一介之使謝罪請命輒稱兵抗拒逐我使人
以怒我大國之師今禍且至矣惟世子計之日燁拜且
泣曰公言良是為我計者皆不知出此前日之戰救死

而已寧不知懼天子知公來必能活我北面再拜誓死
不敢忘天子之德遂迎立道入出奇寶為賄立道一無
所受但要日燭入朝日燭曰貪生畏死人之常情誠有
詔貸以不死臣將何辭乃先遣其臣阮代之何惟巖等
隨立道上表謝罪脩歲貢之禮如初且言所以願朝之
意廷臣有害其功者以為必先朝而後赦日燭懼卒不
敢至議者惜之三十年皇曾孫松山封梁王出鎮雲南
大德二年廷議求舊臣可為梁王輔行者立道遂以陝

西行臺侍御史拜雲南行省叅政視事期月卒於官立
道凡三使安南官雲南最久甚得土人之心為之立祠
鄯闡城與薩達克齊祠至今血食焉時尼雅斯拉建音已卒於
陝西省平章其弟呼遜復由陝西省行臺改雲南行省
右丞既至條諸不便民事於宗王請更張之王不可呼
遜與左丞劉正馳還京師有旨令宗王協力施行由是
一切病民之政悉革而新之豪民規避繇役往往投充
王府宿衛有司不勝供給呼遜按朝廷元額所無者悉

籍為民去其宿衛三分之二馬龍州首謀叛陰與外賊通持所受宣敕納賊以示信事覺宗王為左右所蔽將釋不問呼遜與劉正反覆研鞠姦狀盡得竟斬之軍糧支給地理遠近不同吏夤緣為姦呼遜籍軍戶姓名及倉廩處所為更番支給吏姦始除先是呼遜父薩達克齊為平章時建孔子廟撥田五頃以供祭祀薩達克齊卒田為大德寺所有呼遜按廟學舊籍奪歸之乃復下諸郡邑遍立廟學選文學之士為之教官文風大興王府畜

馬繁多悉縱之郊敗民禾稼而牧人又在民家宿食室無寧居呼遜度地置草場構屋數千間使為牧所民得以安廣南酋沙奴素强悍宋時嘗賜以金印至元諸部悉平獨此尚梗化呼遜遣使誘至待以禮畱數月不遣酋請還呼遜曰汝欲還可納印來酋不得已納之因置酒宴勞令偕印入覲帝大悅大德五年緬國主負固不臣呼遜遣人諭之曰我老薩達克齊平章子也惟先訓是導凡官府於汝國所不便事當一切為汝更之緬國主

聞之遂與使者偕來獻白象一且曰此象古來所未有
今聖德所致敢效方物既入帝賜綯國主以世子之號
烏蠻等租賦歲發軍徵索乃集呼遜以利害榜諭諸蠻
不遣一卒而租賦咸足俄有為飛語及符讖以惑宗王
者呼遜引劉正密為奏馳報朝廷遣使臨問凡造言者
悉誅之呼遜偕使者還覲後卒於江西行省平章贈雍
國公謚忠簡其父沙木斯廸音贈咸陽王謚忠惠兄尼雅斯
拉廸音贈延安王謚忠憲世為元名臣張立道子元亦官雲

南行省左右司郎中

元征緬與八百媳婦國

緬國不載於前史唐書驃國傳在永昌南二千里今緬自永昌西南行四日至騰越州又十五日至其國之江頭城又十日至太公城又八日至馬來城又五日至安正國城又五日至蒲甘緬王城所謂緬中五城也許程已三千餘矣南詔野史載勸龍歲時師子國攻緬遣段榜秀救之破師子國兵得緬舍利以歸其後遂服屬於

南詔宋熙寧間隨大理入貢名始聞於中國元世祖至
元八年大理鄭闡等路宣慰司都元帥府遣奇塔特托音
等使緬國招諭其王內附四月奇塔特托音等導其使价
博來以聞十年二月遣勘馬拉薩哩奇塔特托音等復持
詔諭之曰間者竒塔特托音葉王國使价博詣京師且言
欲觀吾大國舍利朕矜憫遠來即使來使覲見又令縱
觀舍利益詢其所以來知王有內附意國雖云遠一視
同仁今再遣勘馬拉薩哩等往諭王國誠能謹事大之

禮遣子弟若貴近臣來以彰我國家無外之義用敦永
好時乃之休至若用兵夫誰所好王其思之十二年四
月建寧路安撫使賀天爵言得金齒頭目阿郭之言曰
奇聳托音之使緬乃故父阿必所指也至元九年三月
緬王恨父阿必故領兵數萬來侵執父去不得已厚獻
其國始得釋回因知緬遣阿的八等九人至乃候視國
家動靜也今白衣頭目是阿郭親戚與緬為鄰嘗謂入
緬有三道一由天部馬一由驃甸一由阿郭地界俱會

緬之江頭城又阿郭親戚阿提犯在緬掌五甸戶各萬餘欲內附願先招阿提犯及金齒之未降者以為引薦雲南省因言緬王無降心去使必不返六月樞密院以聞十一月雲南省報遣金齒千額總官阿禾探得國使達緬俱安十四年緬以阿禾內附怨之攻其地遣蒲甘大將釋多羅伯級寇金齒欲立砦騰越永昌之間時大理路蒙古千戶呼圖克大理路總管信苴日總把千戶多羅托海奉命伐永昌之西騰越蒲驃阿昌金齒未降部

族駐劄南甸阿禾告急呼圖克等晝夜行與緬軍遇一河
邊其衆約四五萬象八百馬萬匹呼圖克等軍僅七百人
緬人前乘馬次象次步卒象披甲背負戰樓兩旁挾火
竹箒置短槍數十於其中乘象者取以擊刺呼圖克下令
賊衆我寡當先衝河北軍親率二百八十一騎為一隊
信苴日旁河為一隊多羅托海依山為一隊戰良久賊
敗信苴日追之三里抵寨門旋潰而退南面賊萬餘繞
出官軍後信苴日馳報呼圖克復列為三陣進至河岸擊

之又敗追破其十七砦遂北至窄山口賊及象馬自相
蹂死者盈三巨溝日暮呼圖克中傷遂收兵明日追之至
千額不及而還捕擄甚衆軍中以一帽或兩靴一襪衣
易一生口其脫者又為阿禾阿昌邀殺歸者無幾十月
雲南省遣都元帥尼雅斯拉廸音率蒙古爨僰摩些軍三千
餘人征緬至江頭城招降其磨欲等三百餘砦以天熱
還師十七年二月尼雅斯拉廸音等請益兵征緬帝以問丞
相多羅托海對曰陛下初命發哈刺章及四川士卒六

萬人今尼雅斯拉廸音止欲得萬人耳宜從之帝即命樞密
議選將出師十九年命諸王桑阿克達爾同右丞泰布叅
政伊克德濟將兵征緬詔雲南行省發四川兵萬人命
雅爾哈領之叅政阿爾斯蘭督糧餉招討使齊喇先驅
二十年九月大軍發中慶十月至南甸太卜由羅必甸
進軍十一月桑阿克達爾命伊克德濟取道於阿昔江達
鎮西阿永江造舟二百下流至江頭城斷緬入水路自
將一軍從驃甸徑抵其國與泰布會進攻江頭城拔之

獲其銳卒萬人守之圖上其地形及攻守之略先遣使
諭降緬酋不聽據太公城以拒大軍復遣僧諭以禍福
反為所害遂督軍水陸俱進擊破之建都金齒等城皆
降各分兵戍守置邦牙宣慰司於蒲甘城遂振旅還遣
使進緬珍珠珊瑚異藥及七寶束帶雲南行省進破江
頭城所得童男女八千人并銀器幣二十二年緬王遣
其鹽井大官阿必立相至太公城納款乞言於朝廷許
其悔過然後差大官赴闕朝廷遣齊喇使其國二十三

年置征緬都元帥府官俾圖們岱為都元帥總之雲南
王使右丞阿爾斯蘭至永昌與征緬府官會差軍五百
人護送招緬使齊喇至太公城二十四年正月至忙乃
甸緬王為其庶子不速速古里所執囚於昔里怯答刺
之地又害其嫡子三人二月齊喇自忙乃甸登舟還畱
元送軍五百人于彼雲南省請今秋進討不聽既而雲
南王與諸王進征蒲甘喪師七千緬始平命王率齊喇
總兵三千屯鎮驃國設方略招徠其黨定歲貢方物後

齊喇入朝世祖詢以緬國始末擢正議大夫行中書省事佩金符頒詔於緬緬王的立普哇拿阿廸提牙稽願謝遣其子信合八的奉表入朝請歲輸銀二千五百兩帛千疋馴象二十糧萬石詔封為緬王賜銀印子為緬國世子賜以虎符大德三年三月緬復遣其世子入謝自陳部民為金齒殺掠率皆貧乏以致上供金幣不能如期輸納帝憫之止命間歲貢象仍賜衣遣還四年四月遣使進白象五月緬王為其弟阿散哥也等所殺其

子窟麻刺哥撒八逃詣京師令孟古圖嚕默色率師問
罪蠻賊與八百媳婦國通其勢張甚孟古圖嚕默色請
益兵又命薩察固勒等將兵萬二千人征之仍令諸王
庫庫節制其軍六月立窟麻刺哥撒八為緬王賜以銀
印秋七月緬賊阿撒哥也第者蘇等九十一人各奉方
物入朝自言殺主之罪始罷征緬兵而左丞劉深又有
征八百媳婦之議八百媳婦國在緬東出永昌姚關五
十程至其地古未通中國成宗初立左丞劉深倡議世

祖以神武一海內今上嗣歷未有武功而八百媳婦國助綏為逆因請征之右丞相旺扎勒以聞左丞相哈喇哈遜御史中丞董士選諫不聽五年春命深及哈喇岱等將兵往給軍鈔九萬二千錠又給雲南行省兵自願出征者人貝子六十索立征八百媳婦萬戶府二置萬戶四員兵既出取道順元遠冒煙瘴士卒多死驅民轉餉谿谷之間一夫負粟八斗率數十人佐之數十日乃達死者又數十萬人中外騷然而深復脇求水西土婦蛇

節金三千兩馬三千匹土官宋隆濟因苗民之怨給其
衆曰官軍徵發汝等將悉剪髮黥面為兵身死行陣妻
子為俘衆惑其言遂叛破楊黃寨進攻貴州知州張懷
德力戰死因圍劉深於窮谷中梁王庫庫率兵救之賊
衆少解事聞帝始悔不用哈喇哈遜董士選之言乃遣
劉國傑楊賽音布哈等分道進討劉國傑女貞人本姓
烏庫哩後入中州改今姓號劉二巴圖華言敢勇士也
至元中以歷戰功授湖廣行省平章政事楊賽音布哈

初名漢英其始祖楊端唐季應募復播州世守其地為安撫使父邦憲歸元授平章政事追封播國公謚惠敏漢英生五歲而父卒隨母田氏入見世祖賜今名襲職歷陞侍衛親軍都指揮使至是奉命國傑率湖廣兵賽音布哈率四川兵入別敕梁王以雲南兵接應六年劉深等以糧盡不能至八百媳婦國而還宋隆濟蛇節率衆邀擊輜重委棄士卒殺傷殆盡御史中丞陳天祥上書請正深罪下詔招諭諸蠻不報三月罷深等官收其

符券後會赦當免哈喇哈遜曰徽名首釁喪師辱國不
誅深無以謝天下遂伏誅時烏撒烏蒙東川芒部及武
定威楚普安諸蠻因蛇節之亂皆以供輸煩勞為辭乘
釁起兵攻掠州縣復詔伊蘇塔爾蒙古岱等將兵會劉
國傑討之賊兵勁利且多健馬官軍戰不利國傑令軍
人持一盾布釘其上俟陣合棄盾佯走賊來追馬遇盾
皆仆國傑鼓譟趣之賊大敗既而餘寇復合要戰國傑
不應數日度其氣衰一鼓破走之追戰數千里揚賽音

布哈出播境連與賊遇破之前駐蹠泥賊騎猝至賽音
布哈奮擊先進大軍隨之賊遂潰乘勝逐北殺獲不可
勝計遂降阿苴下笮籠望塵途歎者相續七年正月進
屯暮窩四月會戰於墨特川復大破之蛇節降隆濟遁
去遂誅蛇節八年春雲南順元同知宣撫宋阿重生獲
隆濟來獻斬之陞阿重為宣慰使緬與八百皆西廂小
夷緬定而復叛終於議貢八百媳婦國未得過而問焉
而水西之亂作矣楚蜀合兵經年始定大德中撤里路

總官寒賽亦為元江判官度宗顯所誣遣兵討之失利而還都元帥蘇呼勒往諭以大義寒賽感悟遂備珍貢請增差賦置驛傳并以黃金采女遺蘇呼勒一無所受蠻酋嘆曰入我境而不為金婦所餌者元帥一人而已嗟乎邊庭有廉吏賢於十萬師遠矣

雲南諸王

元之以親王鎮雲南自和克齊始也和克齊世祖第五子舍利畏之亂念非親賢不能靖一方或以荒服難之

帝曰朕固樂其風土向非歷數在躬將于彼請分器焉乃以至元四年八月丁丑封和克齊為雲南王出鎮大理鄯闡茶罕章赤禿哥兒金齒等處金鍍銀印駝鈕復置大理等處行六部以庫庫岱為尚書兼王傅柴禎尚書兼府尉寧源侍郎兼司馬重其任也未幾改賜金印五年受命與安南國王討占城真臘八年為元帥布呼丹所弑庫庫岱與謀事覺俱伏誅代鎮雲南者為宗王托呼魯和克齊有子額森特穆爾從征在緬十七年以

張立道言遣蒙古岱迎歸襲封為雲南王金印駝鈕十九年諸王桑阿克達爾率兵征緬二十年詔自今凡雲南大辟仍須待報蓋前此生殺皆在外得自專矣二十二年詔事不議於雲南王額森特穆爾者毋輒行二十五年命雲南王移鎮大理二十七年復以皇孫噶瑪拉為梁王鎮雲南金印獸鈕盖一方二王焉噶瑪拉世祖太子珍戢子也珍戢先世祖卒後謚裕宗生子三長噶瑪拉後謚顯宗次達爾瑪巴拉後謚順宗三特穆爾後謚

成宗噶瑪拉為梁王三年改封晉王鎮北邊以其子松山鎮雲南授梁王印至元三十一年世祖崩成宗嗣位以雲南歲貢馬二千五百匹給梁王數太多命量減之大德三年賜雲南王額森特穆爾及所部鈔三萬八千錠九年詔梁王勿與雲南行省事賜鈔千錠十年賜復如之時梁王蓋松山也征緬與八百媳婦之役又有梁王庫庫者諸王世系中不載豈即松山乎十一年進封雲南王額森特穆爾為營王是歲成宗崩太子德壽先

卒無子順宗次子阿裕爾巴里巴特喇入定內亂迎兄懷寧王哈尚於北立之是為武宗武宗至大二年梁王在雲南有瘋疾以世祖第七子西平王教拉齊之孫羅丹為雲南王賜金印及金銀有差四年九月給委達實部屬馬價一萬二千錠武宗崩阿裕爾巴里巴特喇嗣位是為仁宗武宗有子二長和實拉次圖卜特穆爾初約仁宗後仍傳位和實拉延祐二年仁宗惑於特們德爾之言立其子碩廸巴拉為太子而封和實拉為周王出鎮雲南

置常侍府等官賜鈔四十萬錠是年雲南王婁達實朝於京師四年諸王托克托駐雲南擾害軍民以鄂爾和代之七年仁宗崩太子碩廸巴拉即位是為英宗徙封周王於漠北復以晉王噶瑪拉之孫旺沁為雲南王金鍍銀印龜鈕是時噶瑪拉已死子額森特穆爾嗣為晉王至治三年英宗被弑諸臣迎立之是為泰定帝治篡逆罪流諸王伊埒特穆爾於雲南進封王禪為梁王金印獸鈕食邑益陽州仍以其子特穆爾布哈襲封雲南王又封

周王弟圖卜特穆爾為懷王食邑端州三年召伊特特穆爾嗣齊王給金印謀粘路土官賽丘羅招諭八百媳婦蠻來降銀沙羅土官散怯遮殺賽丘羅勅雲南王遣人諭之四年十一月召雲南王赴上都明年七月泰定崩大臣雅克特穆爾迎懷王入大都立之上都旺沁等立泰定子喇實晉巴為帝舉兵入討俱為雅克特穆爾所殺懷王又迎其兄和實拉於漠北至和寧即位是為明宗未幾暴崩懷王復代之是為文宗是時雲南諸王達實巴

哈圖卜沁巴哈及平章瑪蘇庫等聚衆五萬數丞相額森
吉納專擅十罪將殺之額森吉納遁走八番達實布哈
等偽署叅知政事等官乃詔豫王喇特納實哩鎮雲南
賜其衛士鈔萬錠仍許每歲豫給衣廩是天歷二年十
一月事也明年改元至順正月丁卯諸王圖沁及萬戶
博勒呼阿禾等叛攻中慶路陷之殺廉訪司官執左丞實
都等迫令署諸文牘二月攻陷仁德府至馬龍州調八
番元帥旺扎勒率兵禦之博勒呼引兵西攻威楚威楚城無

武備官吏皆驚匿獨知事董文彥不去被擒令降文彥怒曰汝食君祿不思報恩逆天殄民恨不殺汝乃從汝反耶罵不絕口衆怒截其耳令啞文彥嚼血肉噴賊面遂遇害又攻陷晉寧州南至臨安石屏鎮將朱寶乘間率驍騎五十餘人夜至宣慰司掩襲收所奪符印以歸退據異龍湖之和龍島賊合衆來攻戰艦三百艘衆懼欲降千戶亨祐曰我等戰亦死降亦死當以死報國有言降者斬衆皆踴躍賊舟將至發砲擊之連碎數十艘

斬首三百級圍經七旬糧盡富民王帑出粟千餘石給衆會救至得免圖沁自立為雲南王博勒呼為丞相阿哈呼喇呼等為平章五月博勒呼檄召烏蒙土官祿余襲殺烏撒宣慰司官吏於是羅羅斯諸蠻望風迎降其勢大振四川行省調重慶五路萬戶以兵救雲南軍至境值羅羅斯蠻萬餘人遂遇害千戶祝天祥等引餘衆遁回事聞調江浙河南江西兵一萬命諸王都實特穆爾及樞密判官洪浹將之與湖廣行省平章托歡會兵討雲

南立雲南行樞密院以徹爾特穆爾知院事特默齊嘉
琿為同知副使發朶甘斯朶斯麻及鞏昌等處軍萬三
千人付之徹爾治兵有紀律所過秋毫無犯親率大兵
同鎮西王綽斯本等由四川進特默齊嘉琿則從豫王
喇特納實哩由八番進七月羅羅斯土官撒加伯合烏
蒙蠻兵攻建昌雲南右丞伊埒特穆爾統兵拒賊斬首
四百級蜀軍亦敗撤加伯於盧古驛撒加伯謀建昌守
兵不多而北兵來必由棧道乃與阿柄土官阿刺等以

兵八千燒燬之又遣把事曹通潛結西番聚大兵於大渡河進寇建昌此時王師尚未入滇彝衆一時並舉四川行省官莫敢抗敵但令萬戶周戡統碉門軍弁成都諸屯兵一千七百人抵羅羅斯界以控扼諸蠻又遣萬戶昝定遠同邛部知州馬伯合戡等從便進討八月伊埒兵屯建昌密遣人覘賊把守要隘執曹通斬之自此蠻兵不敢通於西番冬十月烏蒙祿余乘勢欲寇順元以阻東路之兵徹爾遣使趣四川雲南兵進討十一月

四川平章塔爾楚引兵由永寧左丞博囉引兵由青山諸部並進陳兵周泥驛及祿余等戰殺蠻兵三百餘人祿余衆潰遂奪其關隘以通順元諸軍是月羅羅斯撒加伯烏撒阿答等合諸蠻復攻建昌伊埒等追戰於木托山下敗之斬首五百餘級姚安路土官子阿海率州人禦賊俘馘甚衆二年正月權仁德府官曲木糾集義兵敗博勒呼於馬龍州殺其弟巴延又戰於鶯山獲博勒呼及其弟巴延徹爾其黨拜布哈等十餘人誅之餘賊皆

潰惟祿余猶據金沙江二月鎮西武靖王綽斯本豫王喇特納實哩等兩路合兵討雲南時賊勢已漸衰因與伊埒倍道兼進遂奪金沙江大兵與阿禾軍遇戰敗之賊兵猶結寨安寧州再戰又敗之擒阿禾誅之大兵將抵中慶賊兵拒戰於伽橋古壁中伊埒右頰中流矢洞耳後拔矢復戰遂大捷收復行省諸軍皆會駐於城中分兵進捕殘賊於嵩明州豫王與鎮西王擒賊首及諸將校悉誅之磔其屍以徇雲南平惟祿余懼罪竄伏

諸臣請降詔赦之九月祿余復寇順元路雲南行省都
事諾海奉詔徃諭授以叅政祿余拒不受俄而賊大至
海因力戰及晚烏撒兵入順元境左丞特穆爾布哈禦
賊諾海復就陣宣前詔遂為賊害海居官忠勤善辭令
人共惜之時圖沁弟必喇托歡托實挾阿禾餘黨千餘
人竄伏靖江海中據險兵不易上都元帥奇喇為雲梯
登山破其柵殺賊五百餘人於是必喇托歡托實舉家
赴海死祿余亦遁去夫博勒呼阿禾挾宗王之勢誘動諸

蠻陷烏撒圍建昌幾於燎原矣不二年而遂撲滅何哉
足固不可以加首上下分定故也南中雖險遠易於為
亂然敢於過大渡河凜陵上國者自南詔世隆王嵯顛
以來亦不數見卒皆以敗歸終不能併有蜀後之人坐
井自大妄思僭竊適足以自取滅亡耳至順三年二月
祿余言於四川行省乞降并請改附四川詔諸大臣議
之是歲文宗崩立明宗之子廓王是為寧宗逾月崩又
迎其庶兄托歡特穆爾立之是為元順帝至正中梁王

巴咱爾幹爾密一稱博囉以宗室鎮雲南世系莫考元
亡後仍阻險自守明太祖屢遣使招諭不從洪武十四
年冬穎國公傅友德等南伐梁王兵敗走滇池島中友
德等入雲南梁王聞之謂其右丞曰我宗室無降理有
死以報國耳先縊其妃自飲藥不死投滇池水中舉家
從之俱死焉會天下歸明已久無表章之者余謂揆以
余闕之義則博囉不失為忠臣百世論定蓋有待於今
日云

十一 總官

大理段興智降元其弟信苴日為總官屢立戰功傳載元史後嗣承之凡十有一人具詳滇載記中名氏世次間不符正史按元史成於明洪武二年其時雲南未平段氏後代宜未及考究至信苴日父子當必載在冊書非有誣也傳曰信苴日僰人也姓段氏其先為大理國王世祖平大理段興智與其季父信苴福入觀詔賜金符歸國丙辰獻地圖請悉平諸部并條奏治民立賦之

法憲宗大喜賜興智名瑪哈羅嵯命悉主諸蠻以信苴
福領其軍興智遂委國任其弟信苴日自與信苴福率
僰爨軍遼大將烏蘭哈達討平諸郡之未附者攻降交
趾入朝在道卒中統二年信苴日入朝世祖復賜虎符
詔領大理鄯闡威楚統矢會川建昌騰越等城各萬戶
以下皆受其節制至元元年舍利畏叛鄯闡屯守官不
能禦遣使告急信苴日率衆進討大敗之於威楚復遣
將破賊於統矢其秋舍利畏以衆十萬謀攻大理詔都

元帥額森與信苴日討之師至安寧遇舍利畏擊破走之遂復鄯闡定新興進攻石城皆下饗部平三年入觀賜金銀衣服鞍勒兵器十一年薩達克齊更定諸路名號以信苴日為大理總管未幾舍利畏復叛信苴日遣石買等詭為商旅執贊往見挺矛撞殺之及其黨一人梟首於市行省以聞復賜金一錠及金織紋衣十三年緬國擁象騎數萬掠金齒南甸欲襲大理信苴日與萬戶呼圖克領騎兵千人禦之以功授大理蒙化等處宣撫使

十八年與其子阿慶復入覲帝嘉其忠勤進大理威楚
金齒等處宣慰使都元帥留阿慶宿衛東宮陞辭復拜
為雲南諸路行中書省叅知政事十九年詔同右丞拜
達勒迎雲南征綱之師行至金齒以疾卒信苴日治大
理凡二十三年子阿慶襲爵累授鎮國上將軍大理金
齒等處宣慰使都元帥佩金虎符滇載記段興智弟乃
段實無所謂信苴福信苴日者豈實與日音之訛乎載
記稱段實死子忠嗣忠死子慶嗣又稱忠從伐西林破

會川通鄯闡平休林武定緬甸之役皆有功授金齒宣
慰兼掌軍民萬戶府慶為宣武將軍尚公主入朝歸授
行省叅政而元史不載段忠事並存之以俟稽古者慶
死弟正嗣正死慶子隆嗣隆死子俊嗣天歷元年授行
省平章俊死族弟義嗣初授蒙化知州以平叛賊容禾
功陞叅政義死隆子光嗣時梁王以元宗室鎮鄯闡與
段氏分域搆隙至大二年梁王破光兵光將高蓬守羅
那關梁王密遣人招之不從陰賂蓬庵人刺蓬以其首

獻王更戮庖人以自解至正元年玉案山產小赤犬羣吠遍野又雨鐵民舍山石皆穿人物值之多斃四年光死弟功嗣初亦為蒙化知州十二年襲總管二十三年明玉珍自楚入蜀以紅巾為號自將三萬人攻雲南梁王奔威楚求救於功功謀於員外楊淵海卜之吉乃進兵呂閣敗紅巾於關灘江殺獲千餘級紅巾收合餘劖再戰殺段氏驍酋鐵萬戶乘勝屯古田寺段氏夜火其寺紅巾軍亂死者什七八追至回蹬關大敗之功在陣

中得玉珍母寄其子書云爾征南務得之不得輕還軍
少糧乏我當輓致功與楊淵海謀效其書跡易之曰中
國兵來急爾宜蚤歸因募能入紅巾營者有小卒陳惠
請行玉珍得書恐國中有變又新失利遂急收軍回功
追之至七星關大勝而還梁王深德功以女阿結妻之
為奏授雲南平章曲意奉之功遂留鄯闡其原妻高氏
寄樂府促之始歸大理既而復東行其臣楊智張希喬
阻之不聽至鄯闡或讒之梁王曰段平章復來有吞金

馬嘸碧鷄之心矣盍蚤圖之梁王始疑平章密召阿
主命之曰親莫若父母寶莫若社稷功今志不滅我不
已脫無彼猶有他平章不失富貴也今付汝以孔雀膽
一具乘便可毒殞之主潛然不敢受命夜寂人定私語
平章曰我父忌阿奴願與阿奴西歸因出毒具示之功
不信曰我有功爾家我趾自蹶傷爾父尚當為我累之
爾何誑我至此三諫之終不聽明日梁王邀功東寺演
梵至通濟橋馬逸因令番將格殺之阿謐主聞寢失聲

哭曰昨暝燭下終講與阿奴雲南施宗施秀烟花殞身
今日果然阿奴雖死不負信黃泉也欲自盡梁王防衛
備至主愁憤作詩曰吾家住在雁門深一片閒雲到滇
海心懸明月照青天青天不語今三載欲隨明月到蒼
山悞我一生踏裏彩吐嚕吐嚕段阿奴施宗施秀同奴
瓦雲片波溝不見人押不蘆花顏色改肉屏獨坐細思
量西山鐵立霜瀟灑踏裏彩被也吐嚕無知也押不蘆
邊地起死回生草名肉屏橐駝也語雖不雅馴以節故

傳焉平章既死梁王愛楊淵海之才欲收為己用淵海
亦不屈題詩於壁仰藥而死梁王厚恤之令隨平章櫬
歸葬大理大理舊臣仍奉功子段寶事之梁王遣使刺
之凡七攻大理不克乃講和秦陞寶為雲南左丞未幾
明玉珍復侵鄯闡梁王遣叔特穆爾達哈兵大理時寶
已長答書云殺虎子而還喂其虎母分俎粟而自詐其
祖公假途滅虢獻璧吞虞金印玉書乃為釣魚之香餉
繡閨淑女自設掩雉之羅網况平章既亡弟兄聲絕今

止遺一獒一奴奴可再贊華黎氏獒又可配阿結妃如
此事諾我必借大兵如其不可待金馬山換作點蒼山
昆明池改作西洱河時兵來矣時寶姊僧奴亦志不忘
復讐將適建昌阿黎氏出手刺繡文旗以與寶曰我自
束髮間母稱父冤恨非男子不能報此旗所以識也今
歸夫家收合東兵飛檄西洱汝急應兵會鄯闢夫段功
一戰而勝矜功怙寵自蹈禍機宜無足道者乃其妻與
臣之從一而終既如彼子與女之立志復讐復如此蓋

亦有可稱者焉其後明太祖定蜀寶遣其叔段真自會
川奉表歸欵明亦有書報之時有妖巫女歌曰莫道君
為山海主山海笑諧諧國中花謝千萬朵別有明主來
寶數日病死子明嗣洪武十四年遣使授明宣慰使未
幾死叔世權國事明年穎川侯等兵破鄆闡師至威楚
段世遣使致書請依唐宋故事奉正朔脩歲貢友德不
從答書令速降世怒再上書陳利害詞旨桀驁書大抵
皆言蒼潤兩關之險難以兵取友德惡其悖慢春三月

師薄大理夜遣別將緣點蒼山巔繞出下關之背先樹
旗幟遲明段兵驚潰明師斬關入擒段世及段寶二孫
苴仁苴義送金陵上面諭曰爾祖寶曾有降表朕不忍
廢賜苴仁名歸仁授雁門衛鎮撫苴義名歸義授永昌
衛鎮撫餘頭目悉伏誅予至永昌過大官小官廟問其
名云即苴仁苴義也段氏據大理三百五十年興智失
國信苴日復為總管傳至段明今其子孫尚有襲州正
佐者高泰祥之後亦至今世為姚安郡丞孰謂天之報

施不可信哉

明三將軍定雲南

明洪武元年元順帝北遁三年殂於應昌太子代立以宣光紀年梁王巴咱爾斡爾密據雲南猶延元朔洪武四年四川平五年遣翰林院待制王禕持詔諭之梁王遲延不決禕陳說利害王心然之館禕於別室會元嗣君遣侍郎托克托由西番至滇索餉欲連兵恢復覘知其事促梁王殺禕以絕二心禕遂以六年十二月遇害七

年遣故元威順王子巴拜諭梁王八年梁王遣鐵知院等使漠北為徐達所獲解京明太祖釋之又使湖廣叅政吳雲與之偕至雲南諭降及境鐵知院等謀逼雲改服入雲不從復見殺十四年秋九月壬午命潁川侯傅友德為征南將軍永昌侯藍玉為左副將軍西平侯沐英為右副將軍率師三十萬征雲南列侯曹震王弼金朝興都督郭英張銓等俱從上親諭之曰元孽自恃險遠殺害使臣在所必討取之之計當自永寧先遣驍將

別率一軍向烏撒大軍自辰沅入普定分據要害乃進
兵曲靖此地滇之咽喉彼必併力以抗我師審察形勢
出奇制勝正在於此既下曲靖三將軍以一人提兵向
烏撒應永寧之師大軍直擣雲南會城既定分兵徑趨
大理其餘部落可不煩兵而下也師行親餞於龍江丁
未至湖廣分遣郭英等率衆五萬由四川永寧向烏撒
大軍由辰沅趨貴州十二月攻普定普安俱下之進抵
曲靖梁王遣司徒平章達爾瑪將兵十萬屯曲靖沐英

曰彼謂我師疲於深入未有虞心若倍道疾趨出其不
意破之必矣友德然之未至數里忽大霧四塞遂至白
石江頃之霧霽達爾瑪望見大驚友德即欲濟師英曰
我軍遠來形勢既露固宜速戰然亟濟恐為所扼乃整
師臨流勢若欲渡達爾瑪悉精銳扼江岸英別遣數千
人從下流潛濟出其後鳴金鼓樹旗幟達爾瑪急撤衆
禦之陣動英乃拔劍督師濟江破其前軍敵氣索退數
里而陣明師畢濟友德麾兵進薄之矢石雨發聲動天

地敵衆披靡遂大敗生擒達爾瑪俘其衆數萬悉撫而遣之蠻人皆喜曲靖既定留兵守之友德自將北攻烏撒以應永寧之兵分遣藍玉沐英率師西趨雲南癸酉玉等至板橋梁王棄城走雲南省右丞觀音保以城降玉等整衆入城收符信圖籍撫定其民秋毫無所犯自出師至是僅百日梁王在晉寧州忽納砦赴滇池死之傅友德自曲靖趨烏撒郭英等已出永寧攻赤水河守兵破之元右丞實保斂衆拒守友德大軍至實保遁遂

城烏撒版築方具實保引諸蠻復集友德督兵奮擊大
破之斬首三千級得七星關以通畢節進至可渡河於
是東川烏蒙芒部望風歸附分遣諸將進取臨安各路
十五年正月辛巳威楚路平章簡鼐瑪貝叅政徹爾布
哈等赴會震營降壬午曲靖宣慰司樞密同知怯烈該
等及中慶武定澂江三路達魯噶齊等官俱赴藍玉沐
英營降甲午遣使諭傅友德等曰雲南已克區畫布置
尚煩計慮前已置貴州都指揮使司然離雲南遠必另

置司以統諸軍既有土有民又必置布政使司及府州
縣以治之烏撒烏蒙東川芒部建昌之地更宜約束渠
長留兵守禦禁民勿挾兵刃至如靄翠等不盡服之雖
有雲南亦難守也遂置雲南都指揮使司以都督謝熊
馮誠署司事二月置雲南布政司以汝南侯梅思祖平
章潘原明署司事張紈等為叅政叅議等官改中慶各
路為雲南等府閏二月靄翠至京賜衣帽及鈔遣還靄
翠者水西宣慰安氏之祖也大理段世致書友德請依

唐宋故事奉正朔為外臣友德諭令速降世自恃遠險無降意連以書來詞旨桀驁友德怒於是藍玉沐英等進兵至品甸段世以兵五萬扼下關玉等遣王弼率兵出渭水之東趨上關為犄角勢自率衆抵下關造攻具夜半遣都督胡海由石門間道遶出點蒼山後攀木援巖立旗幟遲明大軍望之踴躍謹譁敵衆驚亂英先驅渡河水沒馬腹將士隨之遂斬關而入山上軍亦下腹背夾攻段兵大潰進拔大理城獲段世及段寶二孫乃

分兵取鶴慶略麗江破石關下金齒於是車里麼些和
泥平緬等處相率歸附雲南平三月藍玉遣兵攻拔三
營萬戶砦北攻建昌故元平章伊埒特穆爾降更定雲
南所屬府二十有二州六十有三縣五十有四遣使以
故元威順王之子巴拜及梁王家屬三百一十八人送
京師且請以要害量宜設衛戍守元季田土多為豪右
隱佔歲用不足宜以今年所徵糧并故官院寺入官田
租與土官供輸鹽商中納戍兵屯田所入并給之悉報

可仍置雲南鹽課司以益軍實夏四月烏撒東川芒部
復叛友德移檄沐英合兵進討六月置大渡河守禦千
戶所命吳中率兵守之造舟以通往來仍諭安陸侯吳
復平涼侯費聚會征東川諸蠻秋七月沐英自大理還
軍與傅友德進攻烏撒大敗其衆斬首三萬級獲馬牛
羊萬計餘衆遁去捕擊悉平之乃以烏撒烏蒙芒部等
府地近四川奏隸四川布政司八月遣使諭友德等曰
得報知永昌侯駐建昌大軍已破烏撒次第搜捕林箐

諸蠻山高道隘慎勿輕動聞諸蠻多逃入靄翠境可諭
令縛送軍前其關索嶺非古道古道又在西北可以大
軍躡之開此道以接普定即芒部渠長可盡獲其熟圖
之已復遣使諭曰雲南士卒既艱食不宜分屯止於赤
水畢節七星關各置一衛黑張之南瓦店之北中置一
衛則道路可無礙靄翠之地必用十萬衆乃可定也此
其大概耳萬里之外將軍便宜自處置時友德等方分
兵攻未服諸蠻土酋楊苴等謂城守虛弱遂相煽叛糾

衆二十萬合三十六營兵攻城時城中乏食士卒多病
守將馮誠國用子也與謝熊嬰城固守備樓櫓戰具多
置強弓弩於城上射賊伺賊急輒出奇兵擊之賊不能
破遂圍城為久困計沐英在烏撒聞報馳回至曲靖先
遣人報城中為賊所得紿之曰總兵官領大軍三十萬
至矣賊驚恐拔營遁至安寧羅次邵甸晉寧大祿江川
等處據險樹柵英至與馮誠等合兵勦捕斬首六萬餘
級生擒四千餘人諸部復定十六年二月送故元右丞

觀音保叅政徹爾布哈及段氏等一百六十人至京各
賜其家衣服以觀音保為金齒指揮使賜姓名李觀以
段寶二孫段苴仁苴義為永昌雁門二衛鎮撫以寶在
時曾有降表也先是沐英自大理回故元布延圖復叛
據佛光砦先不花陷鄧川高生圍雲南縣金齒土官高
大惠并也先虎都構麓川彝入寇屠永昌友德自七星
關回兵率郭英等西討破佛光砦布延圖自焚死遂過
金沙江攻北勝府下之擒高生并略鄧川進平麗江平

津等州蠻民降者數十萬戶高大惠逃為白人所殺因置大理指揮使司以周能守之麓川之外有緬國八百媳婦國皆內附於是遣耿炳文諭傅友德藍玉等班師留沐英鎮雲南別命列侯王志仇成張龍分赴尋甸各府繕城池立屯堡安輯其人民十七年四月進封傅友德潁國公藍玉仇成世襲陳桓胡海郭英張翼皆為侯八月麓川思倫法遣使獻方物上元所授平緬宣慰司印十月以曹震開建昌新道向眉州各置驛徒中土大

姓以實雲南十八年東蘭州韋富及廣南特磨道復亂
沐英討平之永昌李觀亦討段首平之十二月思倫法
反寇景東馮誠擊之失利十九年二月雲南臻洞西浦
擺金擺榜諸蠻叛復命傅友德率師討平之并討平越
蠻麻哈楊孟等九月沐英請廣置屯田從之二十年五
月諭沐英勿遣使往平緬葺壘固守以待之英自楚雄
至景東每百里置營率兵屯種以防蠻寇已復命曾震
率四川精兵與陳桓葉昇等分駐各府立營屯種候征

討二十一年春思倫法入寇結砦於摩沙勒沐英遣都指揮甯正擊破之斬首一千五百餘三月思倫法悉其衆號三十萬戰象百餘復寇定邊以報摩沙勒之役英選三萬騎晝夜兼行凡十五日抵賊營遣都督馮誠先出輕騎三百挑之賊以萬人驅象三十餘逆戰指揮張因率騎卒五千餘人為前鋒其渠跨巨象直前諸軍注矢連發矢中象左膝及脇象仆地渠長走追射殺之諸軍譟而前殺賊數百人獲一象而還英喜曰賊不足平

也乃下令軍中置火銃神機箭為三行列陣中俟象進
則前行銃箭俱發不退則次行繼之又不退則三行繼
之詰旦分軍為三隊馮誠領其前寧正領其左都指揮
湯昭領其右將士皆鼓勇而進賊悉衆出營結陣以待
其渠帥把事招綱等皆乘象象披甲背負戰樓若欄楯
懸竹筒於兩傍置短槊其中以備擊刺陣既交羣象突
而前諸軍擊之矢石俱發聲震山谷象皆股栗走指揮
張因千戶張榮祖率騎士乘之直擣其柵遂縱火焚其

寨烟焰張天還復以兵邀擊之殺傷甚衆賊黨有昔刺者亦驍勇復率衆殊死戰左師少却英登高望之命左右取其帥之首來左帥遙見一人拔刀飛騎而下率衆更進英督戰益急不移時賊衆大敗斬首三千級俘萬餘人生獲象三十有七餘皆被矢如蝟死渠帥刀斯郎理各中百餘矢斃象背上餘賊潰英率師追襲之賊連日不得食死者相枕藉思倫法遁去六月東川蠻復叛命傅友德為征南將軍沐英陳桓為左右副將軍曹震

葉昇為左右叅將討之九月越州土目阿資叛阿資本
苦麻部蠻也沐英諭降之至是叛傅友德等將兵至平
彝以山勢險峭遷其山民於早上村留兵立柵其上阿
資寇普安焚劫府治友德進擊之斬其渠滿已青二十
二年春阿資倚崖壁為營友德以精兵促之蠻衆皆緣
壁攀崖墜死者不可數計生擒一千三百餘阿資遁還
越州自恃萬山之險官軍不能至沐英使竇正從友德
合擊大敗之斬其火頭弄宗等五十餘人因請置馬龍

越州二衛扼其衝要分兵追捕之阿資窮蹙降曾震葉昇等領兵分討東川諸蠻亦悉平是年冬恩倫法遣招綱等來言逆叛之謀皆其下刀廝郎等所為以象馬白金入貢自洪武十四年遣將出師至是凡九年而滇始大定沐英留守友德凡三至迨二十五年建昌降將伊埒特穆爾反藍玉復自罕東移師與瞿能等討誅之建昌自滇入蜀之通津也三將軍平雲南功不在漢郭昌劉尚下而曾震陳桓費聚葉昇等次之卒之玉以謀逆

誅友德亦不良死震等先後坐逆黨俱不保首領其得
終有茅土者西平侯而下數人耳嗚呼報功之典何如
哉

沐氏世裔

沐黔寧昭靖王英鳳陽定遠人明太祖初起英以童稚
謁見上養以為子累功加昭勇將軍洪武元年征福建
擒陳友定賜復本姓三年陞都督僉事四年轉同知十
年同征番部有功封西平侯食祿二千五百石賜鐵券

十一年拜征西將軍征西番降元萬戶青沙津等平地
數千里十三年征和林元國托和齊和卓全部皆降明
年出古北口平四郡還京拜征南右副將軍同傅友德
藍玉征雲南不十旬雲南底定十六年詔友德等班師
留英鎮守二十二年朝京師宴於奉天殿賜金銀楮帛
以萬計建宅鳳陽居十日遣還鎮上送之曰汝在朕無
西南之憂矣是年冬周王櫓出鎮雲南未幾召回徙封
岷王於雲南二十五年六月丁卯西平侯英卒年四十

七滇人言是時胡藍之獄株及諸勲臣至多英自知不免一日使至賜英刀繩藥酒三物英出迎於南城外即仰藥死世相傳為哭懿文太子致嘔血云櫬至京上啓棺慟哭追封黔寧王謚武靖英五子其一早卒長春次晟次昂少子昕尚太宗公主屢掌南京都督府事春嗣侯以才武稱二十八年越州土酋阿資復叛春討誅之三十年麓川蠻刀幹孟逐其宣慰思倫倫至京訴詔春討之擒刀幹孟三十一年春卒謚惠襄無子弟晟嗣晟

字景茂少凝重端慤寡言笑溫喜不形於色而質穎敏
讀書強記明太祖愛之甫冠即授後軍都督僉事進左
都督既嗣侯代鎮雲南與岷王不相能上貽書王謂岷
少孤不練事母深責之吾當別勅岷然卒以他故移王
封武岡而岷鎮自如永樂初太宗疑建文帝匿岷所使
使詗察無狀乃止車里宣慰刁暹答叛執威遠州知州
岷諭以禍福暹答懼還州官入貢謝罪八百土酋入寇
岷出次蒙自蠻遁去督兵窮追斬其首以徇上賜璽書

獎勞四年以左副將軍同新城侯張輔分道伐安南先是安南國王陳日焜為其臣黎季犛所殺季犛上表竄姓名詐稱陳氏絕嗣求署國事踰年日焜之孫陳天平至京憇實上遣使詰問季犛卑詞表請天平還國上遣廣西都督黃中等送天平歸季犛伏兵殺天平中等引還上怒故遣將分道出師晟奉命由野蒲伐山通道先驅入安南奪猛烈棚華關隘築堡駐師以造舟分遣諸將出宣光江口昇舟夜至洮水沂流力戰連舟為浮橋

濟富良江與大軍會合攻多邦城柵破之遂擣東西都及盤灘等處所至如破竹賊不能支黎季犛父子走海上追至日南奇羅海口悉就擒械送京師安南平得郡四十八縣百八十六戶三百十二萬五千九百還朝進封黔國公食祿三千石賜誥券子孫世襲再宴於便殿還鎮雲南是年冬安南陳氏故臣簡定復反命晟為將軍討之不利於是英國公輔復受命出與晟合討獲定等檻送京師伏誅簡定所立陳季擴尚未平晟留討不

能下輔復至興晟同破賊於愛子江追至老撾三關執
季擴并其妻子以歸受恩賚如輔富州土官沈絃經抗
化晟受命赴討諭以禍福絃經歸命是時汝南王徙居
大理凡十載以母薨召歸晟終太宗之世恩寵無間仁
宗立召入宴勞賜金幣加太傅宣英二帝嗣位賞亦如
之正統三年麓川思任反侵略騰衝南甸晟受命致討
意在撫諭都督方政為先鋒破平景罕等寨斬首三千
餘級獲象二十餘乘勝深入遇伏力戰死詔問失事狀

晟旋師楚雄歎曰雖偏將違令吾總帥安所辭咎飲藥卒追贈定遠王謚忠敬五月以沐昂為左都督掛晟印充總兵率諸將征麓川昂率師由千崖南甸至隴把破其關寨五年晟子斌襲封黔國公是年秋廣南維摩師宗沙人儂人作亂都督昂平之明年王驥蔣貴等征麓川昂以功遷左都督十年夏六月昂卒追封定邊伯謚武襄命沐斌代鎮景泰元年冬斌卒贈太傅謚榮康子琮幼以侄璘為都督同知鎮雲南天順元年璘卒又以

璘弟瓉代之成化元年琮既冠入朝襲封黔國公三年
還鎮正尋甸廣西土官之罪請設流治屢平諸蠻以功
晉太子太傅賜勅褒獎宏治九年卒謚武僖無子以都
督同知瓉之孫都指揮使誠之子峴嗣朝議謂峴為西
平侯裔孫當從侯爵而守臣爭之謂南人知有黔國公
不知有西平侯也侯之恐為所輕峴十四歲以公代鎮
發兵平龜山竹箐蠻諭定孟養孟密之爭寨者又合川
貴二鎮兵平宋魯亂再擒師宗州賊張長受南安亂苗

那代三賜璽書獎諭再益歲祿百石加太子太傅正德
十六年卒贈太師謚莊襄子紹勛嗣嘉靖十六年卒謚
敏靖子朝輔嗣嘉靖二十六年卒謚恭僖兩公皆加太
子太傅贈太傅朝輔二子融輩皆甫襲而殤弟朝弼當
嗣虐其嫂且錮之不使還南京於是上疏相訏久之始
得襲其淫惡益甚且旅拒王命隆慶六年詔削其爵以
子昌祚嗣而朝弼復欲殺其子逮至京錮於南京之故
第以幽死萬曆十三年平岳鳳論功加昌祚太子太保

二十四年乞休子獻代鎮二十九年以平順大土酋功
晉獻右都督三十五年武定尋甸諸酋反圍省城昌祚
因論奏獻與巡撫陳用賓俱被逮起昌祚原官屢進少
傅兼太子太傅天啓四年十二月卒明年孫啓元襲狂
悖無道屢與撫按構難崇禎三年暴卒子天波襲是時
中原多故惟雲南一隅自保其後土逆沙定洲作亂陷
省城天波遁永昌流寇孫可望李定國乘機入雲南襲
執天波脅之號召土司擁主抗命順治十六年大兵至

天波從遁緬甸為所殺沐氏自黔寧王英至天波凡二
王一侯一伯九國公四都督明開國功臣傳世最盛且
久者惟徐沐二氏夫中山行事人人能言之予讀滇志
稱黔寧在鎮十年墾田九十七萬畝招撫攜貳民始知
有生定遠記人之善忘人之過蠻夷干法不忍加誅用
兵行師非遇有罪不輕戮一人然則其世保滇南爵上
公非偉也宜也武僖而後多雍容好翰墨間不免驕佚
顧諸蠻習其威德猶樂為用至天波流離異域不屈以

死亦無愧其祖宗矣

建文遜跡

按明紀靖難兵破南京建文帝以被火聞實得太祖遺命雜髮從水關出自蜀入滇常往來廣西貴州諸寺中正統庚申出恩恩語寺僧道實當事不敢隱以聞於朝迎入大內以壽終常賦詩云牢落西南四十秋蕭蕭白髮已盈頭乾坤有恨家何在江漢無情水自流長樂宮中雲氣散朝元閣下雨聲收新蒲細柳年年綠野老吞

聲哭未休天下傳誦之予至滇求其遺跡則今武定府獅子山龍隱菴中其像與詩俱存云父老又言初至滇游城中五華寺坐磐石上良久寺僧馳報沐晟密使人覘知之延至家居數日遂赴武定山中語雖無徵王弇州作昭靖傳亦言成祖嘗疑建文帝匿晟所使人調之則此固非滇人之私言也萬曆末年致身錄與從亡日記出所紀帝至滇年月歷歷可考以為帝初出即欲至滇依西平侯史彬止之曰大家勢盛耳目衆多況新

主意尚未釋能無見告帝遂往來吳楚間永樂元年春正月十三日至雲南永嘉寺道人程濟僧應能應賢從應賢松陽御史葉希賢應能杞縣王府教授楊應能也皆以名與太祖所遺度牒合而難髮相從者程濟精於術數嘗預報靖難兵必起下獄後以編修監盛庸軍夜祭祀功碑得璣去姓名免於株及者也二年正月帝離雲南由重慶襄陽入吳游天台雁蕩比冬而返四年夏至沐晟家留旬日遂結茅白龍山六年夏白龍庵災程

濟出募七年春復東行八年回庵遇工部尚書嚴震直於雲南道中震直自縊驛亭未幾史彬程亨郭節至庵訪帝進方物已而棄庵他出九年春有司毀庵夏至浪穹別建庵名大喜十年春應能卒是夏應賢卒另納弟子曰應慧十三年秋游衡山冬還庵十五年冬復至衡十六年還十八年入蜀十九年還自粵東二十年避囂於庵東四十里名祿泉二十一年入楚遂東遊吳越由寧波泛海洪熙元年夏從閩粵還山宣德二年春移居鶴慶

是秋滇亂因入蜀三年至漢中四年夏還六年赴陝西
至延安還蜀七年入楚至杭州吳山復遊天台八年秋
還滇十年至粵西正統元年還居浪穹二年遊峨眉冬
還滇三年復至粵西程濟屢勸還滇不聽濟筮之復不
吉三年有同寓僧楊應祥者詣思恩土知州岑瑛所自
稱是帝因被執同解北者十二人而帝亦與焉訊非是
應祥伏誅戍其黨帝老矣不欲遠行因自白其實使內
監吳亮驗之果是亮自縊帝入宮程濟聞之曰臣事畢

矣回滇焚庵散其徒帝在宮以壽終葬西山不封不樹
右致身錄與日記所載至詳述其略如此近年朱彞尊
上史館書中力辨其偽予在滇求帝踪跡於浪穹鶴慶
無知之者即所謂白龍庵亦未詳其處豈即今龍隱庵
乎而錄與日記又不載帝常至武定獅子山何也要之
建文帝不死於火出亡在外諸書言之甚明當永樂時
禁令苛切而不聞有告之以取寵者謂非有賢者相從
以擁護之不能然矣至欲確指其姓名則當時已自沒

其跡今世遠人亡復何由徵信哉友人顧輿山岱守武定併為程濟等置主配帝於龍隱庵亦善善從長之意云

征麓川

麓川一名百尋自漢以來叛服靡常元中統初始內附至元十三年分置各路以大理金齒都元帥統之有所督則委官以往冬去春還至正初麓川路思可法數有事於隣境諸路以狀聞命河南叅政賈敦熙討之以瘴

起還師戊子再命達實巴圖爾討之亦不克引還可法
遂乘勝併吞諸路猶懼朝廷再舉伐之遣其子滿散入
朝以輸情欵元寢而不問麓川之強始此思可法死其
子昭併嗣立為宣撫八年傳子臺遍一年而昭併之弟
昭省殺臺遍而自立踰年盜殺昭省其弟思瓦代立明
初負固不服洪武壬戌其部屬答魯方刀斯郎殺思瓦
法而立其侄思倫倫即滿散之子也明年陷永昌屠其
城執指揮王真西平侯沐英遣部校郭均美往諭倫內

附放王真還朝廷推柔遠之恩置麓川宣慰司以倫為
宣慰使丙寅復寇景東明年部屬刀斯郎入犯定邊縣
沐英大破之始懼而欵服後為其下刀幹孟所逐奔訴
京師使沐春何福等將兵送之何福擒幹孟思倫乃得
還永樂十五年設四夷館其在西南者百尋與緬居二
焉思倫死子思行立思行死子思暗立宣德中與木邦
相讐殺因而失官改孟養宣慰司以刀氏代之正統初
刀玉賓弱不能輯諸夷思倫法次子思任雄黠善用兵

每言其先世大誤豈有奴與主並之理遂擁衆麓川略取孟養地刃玉賓奔永昌死無嗣正統三年侵孟定灣甸南甸潞江等處大肆殺掠尋攻陷騰衝衛雲南震動事聞遣刑部主事楊寧往諭之不服四年春正月命黔國公沐晟率左都督方政右都督沐昂討之太監吳誠曹吉祥監軍兵至金齒思任遣其將緬簡斷江立柵而守師不得渡初思任未叛時刃玉賓常遣詣晟晟兒畜之至是晟遣指揮車琳等諭之降思任佯許諾晟信之

無渡江意楊寧曰不可兵未加稱降此詐也懼有後悔
晟不從檄寧督餉金齒賊將繩簡數挑戰政怒造舟六
十艘欲渡江晟不可政不勝憤夜獨率其麾下渡江擊
繩簡追至景罕寨破其賊柵斬首三千餘級獲象三十
餘頭與其子瑛部將顧勇等乘勝深入逼思任上江頃
之伏四發政求救晟怒其違節制渡江不遣久之以少
兵往時兵疲食盡政知晟不力援乃謂子瑛曰汝急歸
以全吾宗祀吾死分也瑛牽裾不釋政舉刀欲砍之曰

吾為將受命討賊非死莫報汝何為瑛乃登舟還政復策馬突陣賊為披靡忽馬躡路塹為賊攢刺而死顧勇等一軍皆沒晟聞敗會春暮瘴發燒江上積聚還師金齒事聞贈政威遠伯謚忠毅遣使至雲南諭祭仍詔祠於金齒勇等四人皆從祀晟至楚雄飲藥卒思任犯景東孟定殺大侯知州刀奉漢等破孟賴諸寨降孟連等長官司五月以沐昂為左都督征南將軍右都督吳亮為副將軍馬翔張榮為左右叅將進討思任昂上潞江

之捷陞賞有差五年春二月沐昂討麓川軍抵隴把去
賊巢甚近張榮先令都指揮盧鉞擊賊大敗榮棄符驗
軍器遁昂等不能救師還勅責沐昂等留昂鎮守吳亮
馬翔俱逮下理秋七月思任屯孟羅大掠據者章硬寨
沐昂率都指揮方瑛柳英等進克之賊宵遁威遠州土
知州刀蓋罕戰威江亦敗之已而思任遣流目陶孟恗
怕等入貢禮部議減其饗賚上曰彼來雖緩我師而朕
不逆詐遂賚而不宴賜勅諭之六年春正月命定西伯

蔣貴為征蠻將軍總兵討麓川以太監曾吉祥監軍兵部尚書王驥提督軍務侍郎徐晞督軍餉初恩任貢使至刑部侍郎何文淵上言宜寬其天討大學士楊士奇是之英國公張輔謂恩任世職六十餘年屢抗王師釋此不誅恐示弱小尋非策上從之遂命貴驥先赴雲南復以副總兵李安叅將官聚領川貴兵副總兵劉聚叅將冉保領南京湖廣兵大發兵十五萬轉餉半天下驥薦太僕寺少卿李蕡郎中侯璡楊寧主事蔣琳等為叅

謀陞辭賜驥貴等金兜鍪細鎧弓矢蟒衣以行侍讀劉
球上疏言麓川荒遠偏隅即叛服不足為中國輕重而
托歡額森併吞諸部侵擾邊境議者釋大憂攻小寇舍
門庭之近圖邊徼之遠非計之得也請罷麓川兵專備
西北不報蓋王振專政欲示威荒服也五月驥等至雲
南會賊方困大侯州驥遣將冒暑赴援破之斬首數百
級獲其象馬大軍進至金齒分為三道十一月初五日
俱會上江夾攻三日不下驥令縱火焚柵因督衆乘之

斬首數萬級賊衆敗走保南甸之沙木籠山為連環七寨驥麾兵深入攻其中寨各哨俱奮大破之賊勢窮迫死者八萬餘十二月王驥等直搗巢穴山周三十里柵堅塹廣其東南依江壁立以三千人探之賊象陣伏泥溝突起敗之賊又自永毛摩尼寨至馬鞍山伺我後令都指揮方瑛以六千人攻拔之而右叅將冉保從東路合木邦車里大侯之兵先後斬三十三百九十餘級於是進攻麓川積薪焚其柵思任乘舟走緬獲其妻妾象

馬寶玉無篡子思機潛匿孟養移兵討之捷聞召驥等
還會維摩州蠻韋卽羅作亂自稱廣新王驥遣指揮萬
城擊之卽羅懼逃入安南驥檄示禍福安南人斬其首
來獻七年春驥等至京上宴於奉天門論功封驥靖遠
伯進封蔣貴定西侯並賜誥券世襲侯璡楊寧俱轉侍
郎餘授官陞職者四百餘人既而雲南報思任在緬甸
十月復命貴驥等督諸軍往取之八年春驥率師至金
齒遣使檄緬縛思任父子至軍前仍進兵騰衝分遣沫

昂侯璡等率東路兵徑擣麓川以陳儀領前鋒三千開南牙山斷賊走路使言緬願獻思任欲以重臣往取驥難之郭登請行由金沙江入緬緬酋卜刺浪來會頗裔塞登折之緬氣阻乃叩頭聽命十二月登回其國相緬刺劄以思任載樓船來獻時有嫉登功者乃議留守沙霸刺劄至貢章不見登遲疑不敢獻驥謂貴曰此紿我過江則絕我歸路也陳儀又自詫知天文以為熒惑犯輿鬼緬可伐驥乃密令蔣貴率師匝江而下大戰一晝

夜焚其舟數百艘刺劄竟持任思去貴子雄追之兵敗
自刎東路兵克孟養諸寨思機亦潛竄獲其妻子象馬
而已驥還仍以捷聞王振庇之上慰勞如前加驥貴歲
祿各三百石命楊寧叅贊雲南軍務十年冬雲南千戶
王政奉勅幣諭緬甸許以孟養之地易思任卜刺浪喜
以思任及其屬三十二人付政思任不食垂死政遂斬
首函獻京師因以卜刺浪長子銀起莽為孟養宣撫而
思任二子思機思卜尚潛居其地起莽不能有也十一

年春改麓川為隴川設宣撫司於隴把以舊夷目恭項
為宣撫降勅赦思機等罪令其來朝不至更命黔國公
沐斌侍郎侯璡調緬甸木邦兵討之至金沙江遣人招
諭機疑懼不肯來緬木兵亦不肯渡江遂引還十三年
復議征麓川王驥以原官總督軍務授官聚平蠻將軍
印率張軌田禮方瑛等統漢土兵一十二萬至雲南檄
木邦兵從征緬甸兵備船南甸千崕隴川兵備糧食十
二月大兵抵金沙江賊柵西岸以拒驥令構浮梁亘千

數百尺麾兵悉渡一鼓破之賊歛衆保鬼窟山立三大
塞驥乘勝而進攻皆拔之又破芭崙山各寨踰孟養至
孟那而還諸酋皆震怖謂自古漢人無至此者然思機
思卜竟失所在夷衆復立思任幼子思洪為主以狀來
言緬不能撫其人民願立思氏永當差發時兵力已疲
因許之罿石金沙江與洪誓曰石爛江枯汝乃得渡遂
班師是時會川府訓導詹英劾驥玩法怙終損兵失利
死有餘辜昆明鄉官御史張淑亦劾驥師行無術玩寇

殃民等事十四年二月勅召驥還至貴州值諸苗倡亂
道塞不通人皆留驥為通道驥曰吾征麓川非奉命殺
苗也去之卒為苗寇所截官聚敗歿詔驥代總聚兵還
京調侯璡提督貴州軍務會土木告變王振死驥賞不
行景泰初侯璡以平諸蠻功轉兵部尚書五年緬執思
機送京獻俘誅之自此孟養與緬為世仇數相攻殺嘉
靖初孟養思倫糾木邦宣慰罕烈擊緬據其宣慰莽紀
歲後莽瑞體復強并孟養而有之思氏遂衰

三宣六慰

自麓川平後永昌徼外土司有三宣六慰云三宣者一曰南甸在騰越南半箇山下其山北寒南熱相傳為漢夷分界元置南甸路明初改府又改州正統八年其酋刀氏以征麓川功陞宣撫司一曰干崕在南甸南舊名干賴跋元置鎮西路明初改府尋改干崕長官司亦以征麓川功陞宣撫司土酋刀氏副使刀思丙居盈達同知劉氏居蠻酒經歷廖氏居雷弄知事管氏居猛語皆

自干崕分也一曰隴川即麓川故地在干崕西有諸葛
武侯寄箭山正統十一年設以恭頃為宣撫後改多氏
萬曆中分隴川副使多恭居遮放同知多掩居猛卯各
據所分地受部符又其東北分孟定府地為耿馬宣撫
司其南有蠻漠猛密二宣撫司稍北近內接潞江有芒
市長官司元時為芒施路明置府改長官司今亦稱宣
撫皆陞置在後不得與三宣之數焉六慰在三宣外明
初有十宣慰司後止存其六一曰緬甸一曰孟養孟養

元時為雲達路在諸司之西又曰迤西與緬甸皆自洪武時置其相攻滅詳麓川事中一曰八百大甸即元八百媳婦國世傳其酋有妻八百分居一寨故名洪武二十四年來貢始置宣慰司嘉靖間為緬所兼其酋刀氏避居景線緬以弟莽應龍守景邁城今久為緬有矣一曰車里在八百東即古產里湯時以短狗象齒為獻周公賜指南車歸故名曰車里元兀良台戍交趾經其地降之至元中置徹里路明改車里軍民府尋陞宣慰司

永樂中入寇後懼而謝罪萬曆十一年明伐緬其酋刀
糯猛使貢象實陰附於緬兄居大車里應緬使弟居小
車里應漢使焉一曰木邦相傳為蜀漢木鹿王之後其
地視諸司為稍近內元置總管府明初改宣慰司從征
緬甸麓川俱有功益地頗廣後與緬相仇殺萬曆三十
三年陷於緬緬以猛密思禮領之一曰老撾在八百之
東車里之南與交趾接壤於諸彝為最遠自雲南行六
十八日始至其地或謂即古越裳氏也周以後不通中

國永樂初入貢置宣慰司成化十五年安南來侵殺其
宣慰訴於朝降勅切責安南萬歷中其西鄙纜掌亦為
緬所破六慰雖俱為永昌徼外夷然車里老撾其東已
與臨元接稍內又有孟艮孟定府威遠州孟璉鉏兀二
長官司皆在元江景東順寧境外其附屬順寧者有三
猛曰猛緬曰猛撒曰猛猛更西與永昌相錯有灣甸鎮
康二土州其極西則茶山里麻近為野人所殺掠無噍
類矣大抵三宣以內境日分分則弱六慰以外地日併

併則強今之在雲南南壞忘設官之舊儼然自為一國者西緬甸東交趾而已

鎮守太監

雲南之有監守太監自宣德十年始是時英宗初立閻宦弄權始命內官張達鎮守雲南麓川之役吳誠曾吉祥同在軍其後正統時則郝寧成化則錢能覃平正德時則崔安張倫梁裕史泰而金騰亦有鎮守太監如王舉孫叙崔和吉慶劉玉張誠等與叅將並駐稱二鎮焉

大率皆掊尅土司凌虐紳士而貪殘之狀尤莫甚於錢能成化十二年能私遣其麾下郭英往安南假朝命求夜明珠等寶凡朝廷使安南皆道廣西未有自雲南者於是安南人駭遣使入問欲因啓途縱之還遣一酋率兵尾其後至蓮花灘英紿其酋請先入白守關者遂脫歸其酋駐兵不去雲南大震邊吏戒嚴事頗聞於京大學士商輅請舉剛正有為知識超卓大臣一員巡撫雲南乃改南京戶部左侍郎王恕為左副都御史撫滇恕

至檄按察司劉釤捕英英懼投井死沒其寶物入官其黨械送京師誅之又疏能貪虐於朝先是能鎮雲南久漸謀不軌造紙甲極堅利至百兩一副者殆千領弓刀在公私者必擇而藏之二樓或以告恕將先收其兵甲而後聞能覺盡焚之使所倖厚賂大學士萬安兵部尚書王越因亦誣奏恕並下二疏於都察院恕在滇閱月疏二十上直聲動天下時錢能有錦背鸚鵡能言造一金籠嵌以絕品珠石號八寶籠欲以進上恕聞借觀之

啓籠縱去能怨恕益深廣以金寶賂當路謀急去恕未
幾有旨召恕還恕去能益肆虐榜死人不計而癩翁檳
榔王二事載在滇志世爭傳為笑柄焉其時有副使陳
麒亦以骨鯁數與能相抗卒坐削籍他如張璞之忤梁
裕唐龍之劾崔和俱以不畏勢談稱良御史嘉靖元年
巡撫何孟春請罷金齒二鎮改設府治而金騰之鎮守
革九年雲南右少監劉福安為都給事張潤所劾降三
級巡按毛鳳韶連疏請罷鎮大學士張璁亦以為言而

雲南之鎮守亦革萬歷中內監楊榮復以督理鑛務至
幾開邊釁竟為亂軍所擊死內監之貽害良非獨一時
云

緬甸入寇

緬甸在元時已強明初役屬於麓川洪武二十六年緬
酋南速來朝二十七年六月始置緬甸宣慰司以其長
普刺浪為宣慰賜鈔錠羅綺各有差二十九年遣使來
告思倫侵境事上命行人錢古訓李思聰齋詔諭之思

倫懼請罪永樂元年十月緬甸那羅塔遣使來貢詔定
平緬木邦孟養緬甸八百車里老撾大古喇底馬撒靖
定十宣慰司三年四月緬甸來貢九月始給各宣慰金
牌信符批文底簿命中官楊瑄往諭之七月那羅塔謝
恩入貢四年緬甸與孟養刀木旦讐殺勅行人張洪持
節往諭那羅塔遣使乞宥許之十五年建緬甸館宣德
五年六月麓川思任及緬甸莽得喇各遣使上言木邦
罕門占據其地命黔國公沐晟內官雲仙諭之退地正

統初麓川思任遜緬許緬以孟養之地緬酋卜刺浪乃獻思任并其妻子敗徒板賽等語詳麓川事中宏治元年緬甸來貢且言交趾侵其地二年遣編脩劉戩諭交趾罷兵嘉靖初孟養思倫糾木邦罕烈擊緬破之殺其宣慰莽紀歲遂瓜分其國緬人赴闕訴六年命永昌知府嚴時泰等往勘思倫夜縱彝兵鼓噪焚驛舍時泰等僅以身免時值安鳳之亂不遑問外事也莽紀歲有子生於雪中其體有光滿室因名瑞體紀歲為孟養所殺

瑞體奔洞吾母家洞吾酋養為已子既長與養母通養
父死因有其地洞吾之南有古喇一名擺古地濱南海
與佛郎機諸國隣兄弟爭立瑞體和解之俱德瑞體割
馬革地奉焉受其約束號為嘩哩嘩哩華言公道主人
也瑞體舉衆絕其糧道兄弟逃來等俱死遂併有其地
又得緬僧佐以異術樹海崗七十自衛諸蠻畏服尊為
金鏤白象主時猛密首思漢子思奔思糯相爭奔訴於
瑞體瑞體殺奔偽立思漢次子思琢假途於琢以掠孟

養即留彝目卓吉守之未幾卓吉為奔壘猛乃首別混
所殺瑞體破猛乃執別混三十九年總兵沐朝弼巡撫
游居敬上言瑞體侵輒鄰境當預防內侵時兵書楊博
知緬事悉覆如題議自是滇始於蠻哈設兵冬春防緬
隆慶元年藩司差指揮陳應繡千戶潘應爵買象於猛
密其酋思哲送二弁於瑞體時瑞體方侵車里以茨棘
錮之後勝回乃遣還二年木邦土舍罕拔遣使告襲職
有索賂者以兵備遲疑對彝使歸報拔拔怒與弟罕章

集兵截旅途經年不令漢人通後乏鹽求於瑞體瑞體
餽海鹽五千簍拔感緬而恚中國遂攜金寶象馬詣瑞
體致謝瑞體見拔歡甚贈以寶帶緬鐸白象罽錦珍寶
香藥甚多遂約為父子時有官府只愛一張紙打失地
方二千里之謠云潞江安撫線貴聞拔邀緬惠不肯亦
投瑞體日洩中國虛實教以吞隣內侵瑞體割兩岡地
與之因遣使召隴川多士寧士寧知順逆乃宣天朝威
德聚米為堆百餘譬中國幅員之廣如雲南其百一也

緬所轄特千一耳幸弗妄動瑞體念頗寢士寧歸遇貴
於江滸責其負國啓釁抵隴川值指揮方謐率兵戍蠻
哈士寧語謐曰亦知瑞體之策否上策交罕拔繇木邦
衝順蒙走滄羽中策出木邦背順蒙趨老姚施甸可唾
手取永騰蠻哈區區之隘可恃以拒緬乎謐默然後士
寧為養子岳鳳所毒死子多忠幼千崕宣撫刀怕舉者
與罕拔雖親而有隙怕舉死罕拔言於瑞體請襲千崕
龍川無主必聞風歸附拔願為前驅瑞體卜於緬僧欲

從之其子應裏悍而多智謂瑞體曰隴川千崕雖無主路遠難取迤西思箇地廣兵強為我世讐每欲乘我出襲我倘我兵遠事隴川彼以重兵順流南下被禍非細莫如稍助拔兵聽其自取千崕則成敗不在我瑞體然之借拔兵一萬令取千崕自率兵侵迤西屢為思箇所敗箇亦退保猛倫相持不決隴川岳鳳見其主幼陰欲據其地乃賣重賄投拜瑞體為父導之內侵瑞體因調緬兵萬餘為疑兵出入於緬甸迤西疆上牽制思箇復

檄罕拔兵會隴川岳鳳亦集兵數千屯麓川東㟁聲言
捍緬實治牛酒為迎犒計蠻莫頭目思哲亦迎降緬瑞
體納為義子萬曆元年緬兵至隴川多士寧妻罕氏木
邦女也力不能支懷印信攜二子多忠多孝二女及侄
罕朝光潛奔永昌當事不能救惟令罕氏歸隴川鳳見
罕氏歸遣書給罕拔謂罕氏攜朝光往永昌者為爭汝
官耳鳳請為汝除罕氏朝光以去禍根拔甚喜遂令罕
章罕難等率緬兵五千夜襲隴川罕氏攜二女走田中

為賊斷右臂而死朝光亦被殺二女沒於緬多氏族屬
殘滅殆盡印為鳳得鳳遂受緬鐸據隴川三年偽為錦
囊象函書貝葉緬文稱西南金樓白象主莽嘵喇弄王
書報天皇帝中多狎侮之辭皆鳳所為也鳳又與拔哲
定盟必執思渾下猛密奉瑞體以拒中國瑞體遣子應
裏喇鮑率衆二十萬分戍隴干間罕拔恃緬勢召干崖
刀怕舉弟怕文曰汝嫂我妹也吾欲妻汝并汝兄宣撫
皆為汝襲可據干崖以臣緬怕文挾二子奔詣同知薛

衛守備李騰霄言拔欲怕文背漢事緬娶嫂滅侄無天理怕文世受國恩願與戰次日方戰罕拔以緬兵大至怕文潰奔永昌侄怕宣寄食潞江衛騰霄等退守羅卜思莊拔取干崕印令罕氏收掌且與緬鐸令其臣緬又召蓋達副使刀思官雷弄經歷廖元相俱給以貝葉符令佐罕氏守干崕以防中國金騰兵備副使許天琦憤諸尋附緬遣指揮侯度持檄招諭至迤西頭目思箇從違未決乃刻木二一書天皇帝號一書莽瑞體號率眾

拜之乃卜則天皇帝者卓立几上莽瑞體者傾墜於地
由是決意向中國瑞體惡其倡諸彝內甸且世讐也大
發兵攻之思箇告急適天琦已卒署事副使羅汝芳知
其事厚犒來使更給空頭劄付約事成官以世襲令先
回以待援復陰募憲入緬商人錫之金繪令往緬地默
探其山川道理兵馬糧儲又檄近緬諸彝說其向漢依
期援迤西久之謀者至盡得緬情乃檄調漢土兵馬赴
援師至騰越思箇聞援兵將至甚喜潛令頭目烏祿刺

送領兵萬餘於阿瓦地絕緬糧道督大兵伏於戛撒誘
緬兵入截其歸路而坐困之請令援兵自隴川邀其後
迤西兵衝其前又令水兵開江中石閘以衝潰緬舟計
定緬兵果入戛撒思箇堅壁不與戰伏兵塞險隘絕糧
運以俟中國援兵至首尾共擊之久之緬兵困饑甚以
撮金易合米始屠象馬既剥樹皮掘草根軍中疫作死
者山積瑞體懼請與思箇和思箇不許復遣使速援兵
時近緬諸彝如景邁猛鞏諸酋密受汝芳檄者各調勁

卒俟期共擊無何有入賀行者恐為兵興阻移書同事
合文止援汝芳不聽彼知汝芳意銳仍合揭於巡撫以
兵興禍連語怵之巡撫王凝馳檄止汝芳汝芳接檄歎
恨曰敗迺公事矣兵不得發思箇困緬月餘力已疲望
援兵不至遠近快快岳鳳知之乃集隴川尋兵二千兼
程援緬道之繇間道遁去迤西知緬走率衆追之且追
且殺緬兵大敗生還者十不一二此萬曆四年十二月
事也一時士民以此為大失機會云五年陳直指文燧

按滇得邊報銳意上請經理然與時見相牴牾事亦寢六年遣使將迤西所俘瑞體兵象脩以金幣諸物還瑞體使回緬不稱謝七年永昌千戶辛鳳奉使買象於猛密其酋思混執鳳并軍伴送擺古瑞體方脩佛事遣使持柂榔葉緬文送鳳回是年瑞體復率兵象侵迤西報裏撒之怨中國無援恩箇敗奔騰越中途為奴郎都等執送瑞體不屈遇害瑞體遂盡據迤西目民奔永昌稍安置於內地焉八年巡撫饒仁侃遣舌人李阿烏諭緬

甸阿烏至擺古見瑞體道皇帝威德不侵緬地瑞體唯
唯又語以蔣定西王靖遠征麓川事瑞體不語阿烏又
言罕岳假緬王擾漢地瑞體佯應曰我不知也居旬日
趣阿烏還十年岳鳳領緬兵襲破干崖土婦罕氏降於
緬莽瑞體死子應裏嗣岳鳳執遮放頭目刀落恩送應
裏又嗾應裏殺罕拔拔有子名進忠應裏欲併其地遣
弟應龍伐之拔孽子罕鳳降應裏與耿馬舍人罕虔謀
擒進忠共率兵從應龍以灣甸州景宗真為鄉導追進

忠進忠倉皇挈妻子絕喳哩江奔內地兵象從者不十
一餘悉俘於緬應龍蹕進忠遂入姚關十一年正月朔
焚掠施甸剖孕婦以卜男寇永昌女寇順寧腹破得女
乃攻順寧二月破猛琳寨防守指揮吳繼勛千戶初維
垣皆死之是冬應襄又攻盞達副使刀思廷求救不應
糧盡城破妻子族屬盡為所擄千崖刀怕庚雷弄廖元
伯南甸刀落憲盞達刀思定皆陷於緬巡撫劉世曾巡
按董裕會疏請兵將以南京坐營中軍劉綰為騰越遊

擊移武靖叅將鄧子龍為永昌叅將各提募兵五千赴
援副以土兵應裏亦西會緬甸孟養猛密蠻莫隴川兵
於猛卯東會車里八百孟艮木邦兵于猛炎復併衆入
犯姚關子龍為壘靜待大破之於攀枝花地斬宗真計
擒罕虔父子等劉綎率兵出隴川猛密直抵阿瓦阿瓦
頭目莽灼瑞體族弟也糾猛密思忠蠻莫思順詣綎請
降應裏聞之起兵破灼灼內奔行至曩朴寨病死先是
灼有白象一能決勝敗不爽每出兵咸問之瑞體常借

以自隨至應裏假象不歸且欲害灼灼心寒因綰招之故降及灼死應裏以子乃篤改名思斗莽肘者守阿瓦初綰破隴川以岳鳳有心計厚結之以招諸彝許不死故猛哈思化迤西思威木邦罕鳳等俱殺緬使詣綰降進忠亦集其餘衆來奔諸夷畏綰望風內附者踵至當事不知日促綰擒岳鳳綰不得已執鳳及其子曩烏等俘解京師猛密思忠懼復率錫波思奇投應裏諸彝多復叛當事惟以得鳳與罕虔為功不復問緬也迤西思

威既內附其屬部有密堵送速二城久為緬據威提兵復取之十四年應襄徵二城兵不應怒攻破之以多曩長散鐸率兵屯守十五年思威糾思化思順各土兵又求助以復二城遊擊劉天俸令募兵五百往助之緬見以為漢兵大至驚潰威乘勝殺緬千餘人并二城之從緬者陣斬緬目多曩長遂復二城金騰兵備李材上其事下蘓直指鄭覆覈時在陣多土兵不知取級既而復往則已腐濫遂以冒功復奏逮材天俸俱下獄論者寃

之十六年十月思順亦投緬朝命以思忠等歸義陞忠
猛密宣撫思化猛哈同知思順蠻莫安撫如邊城所議
也比符信至而思忠思順等已復投緬乃以忠母罕烘
順母罕送各代子領該司印九月應裏攻猛密罕烘不
能拒率其孫思禮從子思仁奔猛廣而猛密失猛哈思
化復進奔蠻莫據之罕送率其子思華奔騰越時有問
罪思化之議巡撫蕭彥密令撫彝同知漆文昌撫化文
昌單騎入化壘化稽願聽命且云奴有助迤西殺緬賊

功今無所歸願寄食於蠻莫從之十七年迤西思威死
其支子思明子思遠進象及方物朝廷令遠為孟養酋
長十八年應裏報密堵送速之怨進兵孟養遂破孟拱
遠與子思昏奔益西應裏偽署堵罕於孟養甕罕於猛
拱十一月緬破猛廣罕烘思禮與思忠妻甘線姑奔龍
川思仁奔雅益猛廣亦失十九年應裏率猛別阿瓦糾
堵罕甕罕兵象圍蠻莫思化告急時鄧子龍方聽勘奉
檄率兵至卜羅思莊緬退去化復還蠻莫六月應裏遣

使等母海弄查賚貝葉緬文來求通鎮巡給榜文送緬使歸二十年思仁叛投緬仁蒸嫂甘線姑因欲得之時線姑隨罕烘思禮窩隴川仁自雅益率兵象犯隴川欲擄線姑隴川宣撫多思順有備弗克逞懼中國問罪乃同丙測奔緬應裏偽立仁於猛密當事者移置罕烘思禮於芒市六月應裏遣使擺線由迤里賚貝葉緬鐸招隴川干崖南甸諸土司當道給緬使文告令之還九月應裏令阿瓦迤西犯蠻莫思化等奔等練山叅將鄧子

龍提兵營等練緬兵屯遮邀子龍發兵擊之大戰於控
哈斬首百餘級把總李朝岳順戰死緬退屯沙洲我兵
無船不能進相持彌月緬尋退去二十一年應裏以允
墨守蠻莫墨乃糾猛拱堵罕孟養甕罕猛密思仁兵號
三十萬衆百隻以普坎雍罕直郎三鷲酋率衆擁送允
墨據蠻莫思化敗走墨等立九大營深溝高壘為火駐
計仍分道內犯一入遮放芒市一入臘撒蠻額一入杉
木籠並出隴川多思順不敵奔猛卯二十二年春巡撫

陳用賓出駐永昌聞賊大入等練隴川乃分部以叅將
王一麟奪等練中軍盧承爵出雷哈都指揮錢中選張
先聲出蠻哈守備張先蔭出打線一麟擊其前承爵中
選擊其左右賊狡甚始以羸兵數人飲馬江干而浴之
前鋒者擊而俘焉以捷聞居數日又以一象馬數匹來
官兵又擊而俘之又以捷聞緬兵退走遂復蠻莫官兵
以賊為易與鼓行而前不知賊兵潛伏營於崕箐乘官
兵過半賊衆湧出官兵被截時寧州目把者義領兵在

前失道陷泥中為賊所殺後二營相繼退奔監軍同知
姚允升收殘軍用百金買諜者晝伏夜行望等練諸山
火光不息知賊已焚巢退去因稱勝而還是役也緬取
道隴川猛卯多俺實禦之多思順怨俺乃糾思化并芒
市多泰等擊俺殺俺子多荒十二月俺糾思仁丙測由
猛卯襲遮放官兵戰却之斬級百餘巡撫陳用賓以緬
數入犯築八關於騰衝之邊曰萬仞曰神護曰巨石曰
銅壁曰鐵壁曰虎踞曰天馬曰漢龍每四關設一守備

戍之又募習彝路者得閩人黃龕使暹羅使與得楞內外夾擊緬多俺自遮放敗還不復歸猛卯投木邦負嵎於曩義山殺天馬漢龍二關工役督工漆文昌計授木邦罕欽令擒之謀頗露俺欲奔擺古欽追及於雷聳并其子多烘多曩斬之緬因俺死頗寢寇我東路云二十四年二月築平麓城於猛卯大興屯田是時邊事旁午餉費不貲轉輸米石運價至十金而值不與焉諸郡邑不支故陳用賓銳意興屯三宣之內屬彝徭賦所出餘

田無多惟猛卽古麓川地阡陌膏腴多俺既死無主乃
議以營兵任屯非營兵而願屯者聽二年小成免其賦
三年大成始十一而賦之十月緬督思仁丙測等寇蠻
莫思化求救叅將吳顯宗遣兵擊走之斬丙測二十六
年正月車里老撾刀舊猛怕猛等慕義入貢六月耿馬
罕們灣甸景從真鎮康刀悶枳盞達刀恩權等亦脩貢
事十二月孟養思轉棄緬來歸進象隻方物二十七年
緬擊思轉檄各土司赴救緬潰歸二十九年蠻莫思化

子思正乘多思順之喪襲隴川據其妻罕氏明年阿瓦
雍罕攻思正木邦罕拔子罕謐率兵從之正奔騰越當
事者殺正以止兵三十一年雍罕罕謐俱遣使欵貢自
此邊境少康而緬酋莽應裏連年為逼羅得楞所攻長
子莽機過見殺擺古殘破亦不復內犯矣

武尋諸府改設流官始末

明定雲南置藩臬郡縣吏賦役學校一與中土等復慮
彝情反側有司遷轉不常莫能得其要領仍以土官世

守之正統而後見於志乘者土知府則景東陶氏蒙化
左氏麗江木氏順寧猛氏永寧阿氏廣西昂氏滇沅刀
氏元江那氏尋甸安氏武定阿氏土同知則姚安高氏
廣南儂氏土知州則安寧董氏鄧川阿氏雲龍段氏北
勝高氏寧州祿氏霑益安氏路南秦氏羅雄海氏寶山
蘭州俱羅氏富州沈氏土知縣則嶍峨祿氏雲南楊氏
元謀吾氏以及長官司暨佐貳首領雜職各官實繁有
徒焉皆治以漢法與徼外諸司止遙相羈縻者有間矣

然積久而驕或撫循失道致釀變亂如尋甸武定順寧諸酋其革除始末有可攷者成化十四年尋甸安晟死兄弟爭襲廣西昂貴虐其民巡撫王恕與黔國公沐琮奏罷之改設流官知府宏治十七年增設寧州流官知州正德初武定阿英襲知府改姓鳳氏交通劉瑾以賄陞右叅政仍理府事擁衆入省欲於布政司堂上任不許乃就司儀門上任而去自是潛畜異謀日益橫暴尋死于朝明應襲火頭吾孟才列其惡狀以告署元謀縣

典吏談章章以告巡按御史唐應龍奏請依照鶴慶等
府例改設流官朝明聞之載金寶二十萬賂寵臣錢寧
寧囑巡撫欲仍令朝明襲職龍持不可設流事竟中止
嘉靖六年尋甸知府馬性魯因徵糧繫馬頭安銓妻於
獄裸撻之銓遂叛掠嵩明等處進攻尋甸分守叅政黃
昭道兵備副使周奎督兵與戰敗績遂陷尋甸執知府
雲南鎮巡調各土司兵赴討令武定首鳳朝文以兵千
餘守廠江朝文明弟也素與銓通銓妻又鳳氏明年

春朝文自廠口擁兵叛還攻武定陷之殺同知袁俸知
州秦鍵等官十三人遂與銓連兵二萬于會城西北門
外焚軍民房屋雲南大震事聞命兵部尚書伍文定自
京師出征未至按察使徐瓚議調各土司兵與衛軍協
力勦撫朝文等戰不勝欲奔東川霑益州營長輔祐追
獲斬之安銓亦為兵夫阿志所獲五月文定至雲南奉
旨處置未盡事宜數月乃還三十年元江那鑑殺侄奪
印聚掠郡邑巡撫石簡督兵往討鑑詐降請官撫諭簡

命左布政使徐樾往為所殺巡按趙炳然以狀聞奪石
簡官切責黔國公沐朝弼令戴罪殺賊贈徐樾光祿寺
卿賜祭葬三十二年巡撫鮑象賢奉旨討元江那鑑自
殺遂革其官收印信令臨安指揮往署之三十六年易
門縣彝李向陽與土縣丞王一心等作亂稱混天大王
以普文為軍師構黨七千人分布四掠一心復與武定
阿倫通阿倫者鳳朝文養子也朝文既誅其妾瞿氏撫
幼子守土盡職後子死子妻索林復署府事而瞿氏有

外行忌其婦阿倫潛謀奪嫡挾貳赴京納級指揮使名
鳳繼祖揚稱已襲武定知府輿馬冠帶以歸土人附之
遂逐索林巡撫宗慶奏請討之阿倫潛奔四川會里
州招集亡命誘索林與講好殺其總管鄭竑等七十人
出富民羅次界抄掠又分遣東川營長阿科等兵攻曲
靖尋甸諸府時教宗慶已罷新撫呂光洵以工部左侍
郎奉命至四十四年先討易門賊李向陽誅之復調各
土司兵分路勦武定移檄黔蜀巡撫舉兵接應遂破諸

蠻阿倫北遁兵備僉事張澤追之被執逼令致書鎮巡
乞招撫澤不從潛使人達光洵速進勦竟被殺贈光祿
寺少卿九月光洵自率師追阿倫至會里州斬之併誅
王一心等隆慶元年光洵請改設武定流官知府置守
禦所立學校從之二年武定鳳歷復作亂伏誅三年增
設鄧川流官知州萬歷元年鐵索等力攻彝叛巡撫鄒
應龍同黔國公沐昌祚討之七十二村悉平二年二月
移兵東征臨安王弄山母濮等彝八月征菴甸等彝皆

平之立營戍守東迤六郡乃安十三年羅雄州土酋者
繼榮叛巡撫劉世曾討誅之初土知州者濬悅營長之
婦殺其夫而奪之踰年生繼榮有異質兩耳垂肩左手
過膝十四歲即欲殺其父濬不忍置法假為延師幽之
別室仇父益深隆慶時濬年老無嗣乃釋之遂借婦家
勢力據州逐父父訴之當事不得已迎歸陽為尊禮亦
幽囚之辛巳調征緬繼榮懼父作難授意目把弑其父
及歸官鞠其事繼榮據險不出但云身在外父死不知

而已弑父後并囚其母烝父妾虐部彝多淫民間女侵
占隣土不輸站馬拘繫官役益無忌憚從征時與霑益
土婦安素儀合兵遂與姦密誘之招婿往來蓋兩州兵
力擅滇東可依藉為逆也越州土舍海現圖寡嫂資氏
有姿色繼榮每出先頓兵其家縱淫樂數夕方去知州
越應奎憤甚白兵備謀於資氏床幃間擒繼榮謀泄脫
走乃招集亡命煉習妖法脩築東龍石城令部兵四出
攻劫師宗維摩等州撫鎮遣將分兵四路擊破之斬獲

四千餘酋繼榮潛遁外父隆有義家有義慮禍及已密約官兵追捕斬之其妻大小隆氏及七姓家奴復於十四年九月倡亂據州治執知州驛丞大肆猖獗巡撫檄越州守備張先聲掩誅之始改州為羅平調曲靖中左所為定雄所附州守禦十九年丁苴白改彝普應春等叛巡撫吳定檄叅將鄧子龍討平之其地居臨安新化南安間素為盜藪因請設新安縣并改新化州隸臨安二十五年順寧猛廷瑞與兄思賢相攻殺大候州奉學

廷瑞妻父也興兵助之巡撫陳用賓疏請征勦遣叅將
吳顯忠將兵至順寧廷瑞困急乞降巡道李先著令擒
奉學自贖廷瑞乘間遁入觀音山勢復振顯忠再集兵
攻之誅奉學執廷瑞送軍門因改設順寧流官知府改
大候州為雲州設流官知州併坐李先著以受賄縱賊
下獄死人多寃之二十八年矣堵十三寨莽亢等復叛
再討平之順大始定三十五年武定酋阿克有馬頭四
十八人鄭舉獨稱豪有力且富於財知府陳典以廉訪

收禁之舉以兼金置魚腹中饋典獲免已而復收之如是者再四舉惡其無厭乃與酋阿克等攻破府城殺指揮金守仁千戶王應爵等男婦四百五十餘人時陳興以入賀在會城舉等擁推官白明通以兵隨其後直抵會城進公移請以冠帶印信給阿克賊從北門外遶西南而東分道四掠沿村鎮市焚劫一空老稚不及避者殺之壯者齒而歸圍城三日不去以印綯與之始拔營歸攻元謀和曲諸城未一月陷一府三州四縣賊兵所

加勢如破竹時尋甸彝目大理保楊禮亦屢被官司責
辱遂結連彝目招補阿白者色及彝婦海沖等叛攻破
嵩明署印知事李性先棄印逃吏目常宗孝學正龍旌
死之賊進逼楊林都司汪如淵率土兵赴救賊退歸攻
尋甸殺指揮諸藩裕等巡按御史周懋相候代駐曲靖
調沾益安紹慶土兵檄同知孫台監督自嵩明追賊尋
甸屢戰俱捷三十六年春三司官亦分道追賊而鄭舉
等已酉攻祿豐破之知縣蘇夢暘力戰死六月諸路兵

至擊賊斬其家屬十一人阿克鄭舉等逃東川官兵追至東川境上土司祿哲縛阿克鄭舉獻軍前左布政彭應時復擒其黨鄭文鄭宗舜叅政楊俊臣率廣南儂兵亦擊敗海沖等得嵩明州各印信副使羅希益同都司江如淵督安紹慶兵斬楊禮男楊成俘妻妾四口遊擊段辰擒楊禮妾及子三人兩路賊俱平惟武定府印竟失所在既而治失事狀巡撫都御史陳用賓黔國公沐廩叅將張名世武定知府陳典推官白明通元謀知縣

毛文彩俱逮訊自正德至萬曆內彝之變數起而武定
居其三雖蠻酋橫暴亦由我有以致之內而劉瑾錢寧
受賄相庇外而馬性魯陳典輩以貪暴激成之至猛廷
瑞之事世尤稱其寃嘗見夢於黔撫被甲如神人曰吾
為陳巡撫冤死訴帝得請歸過此欲見中丞云逾月而
用賓被逮用賓撫滇十七年經理緬事頗為盡力但喜
功多殺吳顯忠迎合其意陷李先著於獄雖以功得晉
爵卒之身填囹圄為天下笑亦何益哉四十二年巡按

毛堪奏辨李先著冤不報是年雲龍州段進忠以殺土官段嘉龍罪被誅巡撫周嘉謨請改設流官知州裁革五井提舉以鹽課併歸之他如安寧路南元謀以及麗屬寶蘭二土州俱未詳所由革元謀後有吾必奎者以武功著天啓中作亂被誅其事另載於後云

珍貢

雲南古不毛地也且舟車不通商賈罕至人有百金之業便為素封貧者至不保朝暮即其土所產或反不如

他處易求者而世多膠於金鏤作貢之說動以滇為金
穴寶山不肖有司因而張威勢以索之彝性輕生每極
於勢無復之輒起為亂後人不知其故謂滇難治嗟乎
豈滇真難治也漢鄭純毫毛不染而哀牢化隋梁毗對
餽金慟哭而諸彝感悟遂不相攻元舒嚙杰不為金婦
所餌而車里歎服彼皆非三代以上之人猶能以廉勵
俗若此奈何末世上作而下効之明三百年叛者十數
起推其由來多因贖貨予故於內外彝蠻動之後復載

珍貢一篇夫亦曰知所以亂之由則知所以治之之道矣語云金生麗水今麗江其地也江滸沙泥金燧雜之貧民淘而鍛焉日僅分文售蜀估轉諸四方永平山中亦有金沙色赤而利更微明初歲貢金二千兩官償價銀一萬一千四百有奇皆蜀賈有力者先期受值走四遠哀入之然金少價高率賠其三之一間有窮極而逃者因舉殷實土著以當金戶寶石琥珀等珍皆責其供辦產盡則更舉一家萬曆十八年又增金三千歲共貢

五千兩公私益困末年始減二千天啓水鳥之亂奉旨
暫停事平再進銀鑛約有二十三所皆置場委官以徵
其課又銅鑛十九所鉛鑛四所萬曆二十年命內監楊
榮至滇督理礦稅榮又使千戶張國臣赴京上疏請開
寶井於猛密先是寶石之取盛於成化然止在京購買
嘉靖丁亥始遣官至滇歲動布政司及永昌府銀八千
散之民間民間鬻男販婦不充所值因而逃亡其後六
慰變亂猛密寶井已為緬所據國臣又倡此議巡撫陳

用賓懼開邊禍連疏陳諫始仍舊例然猶每歲布政司獻寶石三百六十兩有奇礦金四百兩礦銀一萬兩稅監楊榮竟以貪酷激變於三十四年正月八日為衛軍所殺舉火焚公署閩府百餘人俱死焉琥珀出孟養山中價不甚昂而蠻漢阻絕商賈難通萬歷二十二年奉旨責輸二百餘觔遍派滇西諸郡雖不通緬者亦行責買時惟騰衝庫內舊貯二十餘觔悉送上供他郡無以應命搜括士民有即舉首多以破家亦竟不能完數也

點蒼屏石產大理府雖不在外彝然採艱運遠亦以累
民嘉靖十八九年曾奉取用二年之外始得至京至三
十七年取方三尺五寸者六塊自本年六月至十一月
止行三百里運至普淜因重不能前進四十年又行取
五十塊高六七尺不等巡撫蔣宗魯抗疏諫止然當時
取辦尤不論何項石紋至萬曆二十一年為兩宮鋪地
詔取鳳凰石百餘求之益艱供役者十死八九惟高不
過三四尺人猶以為蔣公之力焉右志乘所載皆止行

之自上者耳其他長吏之饋遺權要之悉索不可勝計
民窮思亂亦孰能禁之哉

議開金沙江

金沙江源出吐蕃界至共龍川犧牛石下南流漸廣故
名犧水後因訛為麗水云東經巨津寶山二州三面臨
麗江府又東經鶴慶受樣共江諸水又東經北勝受桑
園龍潭程海諸水又東經姚安受蜻蛉弄棟龍蛟諸水
又東經楚雄定遠受龍川江諸水又東經武定北受元

謀西溪滇池螳螂川羅次富民諸水又東經東川濟慮
部過烏龍山受尋甸牛欄江谷壁川齒化溪諸水又東
經烏蒙南又東經馬湖府受尼溪大汶小汶諸水又東
至叙州府合大江此南中西北之險蒙氏僭稱北瀆者
也正統間靖遠伯王驥曾議開濬未果至嘉靖初巡撫
都御史黃衷復議開工役垂具為武定土酋鳳朝文所
梗會衷即陞任事遂寢其後巡撫汪文盛亦委官踏勘
而朝文妻瞿氏為女土官又從而阻撓之巡按毛鳳韶

知其事分巡洱海時復上議云雲南有水路直抵四川
馬湖府初以遐僻為土人所據我國家郡縣其地同於
華夏然貢獻之物損官使之行李軍民商賈之往來擔
負千里筋力已疲而土官土舍因見道路阻絕每懷異
志及今國勢強勝不行開通將來之悔不敢謂無也本
道訪據武定府揭稱本府有迤東水路自雲南海口至
安寧羅次富民只舊你革達吉普渡河安革法於土色
出東川大江邊至阿納木姑共一十三站內土色有疊

水又迤西水路自雲南陸路至富民武定虛仁環洲凡五站至金沙江巡檢司下船至罵刺母白馬口察刺則五曲革直勒則卓刺除魯圭寧抄答甸沙吉撒麻村亦至土色大江阿納木姑凡一十四站內卓刺沙吉有豐水又據金沙江土巡檢稟宏治正德間馬湖府安監生放杉木嘉靖十七年王萬安亦放杉木俱五板大船經過中惟虎跳天生橋亦十分不為險阻又據姜驛驛丞稟每見販木客人結成簰筏自本公司江流六日即抵馬

湖等情各到道為照前項水道武定迤東極為捷徑但訪得河內間有蠻尖石兩邊岬石生合成橋水從石縫流下未委虛的若迤西金沙江則水面洪濶四時橫流客商通販前後不絕中間雖有虎跳二灘然皆沙石易鑿此斷然可通而無疑者也合無先將東西二道各委能幹官帶領匠役鄉導沿河踏勘直至馬湖中間要見舟楫無礙者幾處危石可鑿者幾處幾丈幾尺如有絕險人力難施者或作兩截盤運沿河陸路可通者幾處

不通而應合開闢者幾處幾里幾十步及沿江有無人
烟稀密堪立驛遞哨堡等項各計合用功力人匠若干
錢糧若干勘估明白畫圖造冊回報然後擬議奏請開
通不獨一時一方之利實國家久安長治之計云適值
地方多事議竟不行隆慶初鳳首誅滅巡撫陳大賓復
為題請而議者多甲乙之詞大抵謂金沙之道一通則
商賈競於舟而憚於陸筭繙之利告竭於程番之八府
而九驛之途鞠為茂草矣至天啓中安首倡亂貴陽道

阻頗議開通按察使莊祖誨謂自巡檢司開由白馬口
歷普隆紅巖石刺鮓至廣翅塘皆祿勸州地其下有三
灘水溢沒石乃可放舟涸則躋岸纜空舟以行又歷直
勒村罵刺土色皆合禮州地其下有鷄心石石如堆者
三累江中舟者相水勢緩急可行又歷踏照亂得頭峽
刺鮓至粉壁灘甚駛皆東川地又歷驛馬河新灘至虎
跳灘陰溝洞皆巧家地虎跳湍瀉陡石不可容舟陰溝
二山頽集水行山腹中皆從陸過灘易舟而下又歷大

小流灘為蠻彝司地又歷黃郎木鋪貴溪寨業灘至南江口為烏蒙府地始安流自廣翅塘至南江木商行之可十日又至文溪鐵索江邊數灘歷麻柳灣教化巖為馬湖府地又歷洩灘蓮花三灘會溪石角灘至叙州府其說甚明晰然此時明運將終救敗不暇竟莫能開通也續禹功所未至以疏西南朝宗之水道是所望於全盛之世矣

滇南科目

滇自南詔竊據風化阻絕大理國頗設科取士皆以僧道讀儒書者充之至元皇慶中以學士李孟奏開科三年一試天下共取三百人雲南每榜止五人蒙古二名塞目二名漢人一名如王楫李敬仁段天祥李天祐李郁等史載其名云明洪武三年開科天下共取五百人是時雲南未入版圖六年停科十七年更頒定程式始增建雲南學校二十二年始選貢送監就應天府鄉試以人才尚未充也至永樂九年詔雲南布政司取士是

歲八月舉生儒洪誠等二十八人誠與楊春皆舉進士
九月復試貢生取趙誠等二十一人此有明科目之始
也是後三歲一舉或五十餘人或三十餘人多寡不等
洪熙元年定額十名宣德四年貴州附試取十一人明
年增額四名雲南十名貴州五名正統八年共增五名
十二年又增五名皆滇三黔二景泰立詔雲貴科舉不
拘額數元年取至三十六人四年至五十五人七年又
定額三十名成化三年增至四十名十年又增五名宏

治中貴州士子以赴試雲南道險遠不便屢言於大宗
伯張昇求於貴州開科昇不允止奉詔雲南鄉試錄改
稱雲貴鄉試錄而已八年黔撫臣復以為言亦不允再
增科額五名正德五年又增五名則滇四而黔一也嘉
靖十四年始詔貴州布政司開科歲取士二十五人雲
南四十人萬曆中漸增至四十七人天啓元年巡撫沈
微炌又請增三名以足五十之數中間人才疊出如雲
南府則有若副都御史李公純贈光祿少卿毛公玉兵

部左侍郎孫清愍公繼魯吏部尚書嚴恭肅公清鴻臚
卿劉公文徵兵部尚書傅忠壯公宗龍總督侍郎贈尚
書楊公繩武御史趙公譏或以功名顯或以直節著而
安寧楊文襄公一清相業軍功尤為有明第一其在外
郡若大理之楊憲副南金楊內翰仕雲李太守元陽趙
考功汝濂李御史東臨安之張御史西銘包尚書見捷
永昌之張侍郎志淳與其子舉人舍憲副合曲靖之張
憲副璁澂江之楊郡丞以成蒙化之雷侍御應龍鶴慶
憲副璁澂江之楊郡丞以成蒙化之雷侍御應龍鶴慶

之趙長史德宏彭都御史富諸公皆以經濟文章節義有名於時其他起高第登仕籍祀鄉賢者尤不可更儕數永昌王宏祚以明鄉薦入

本朝歷官戶兵刑三部尚書是時雲南為孫李竊據甲午丁酉咸有所舉己亥歸版圖辛丑補行鄉試歲以為常趙士麟等七人前後成進士夫滇與閩粵皆開自漢武帝其時盛覽張叔已從司馬長卿學賦受經後此若尹珍許叔之文學隗叔通之孝行皆著名於益州者舊

水經註諸書迨蒙段盜竊阻聲教者五百餘年故其人文不獲與東南競勝元始混一有明科目班班可見者若此嘗觀周漢以前江南之人或曰蠻荆或曰山越至於今科名之盛幾駕充豫而上之亦安知後之滇黔猶今之吳楚哉是在世之司文教者

水烏之變

貴州水西宣慰司與四川烏撒土府皆安姓萬曆中播州楊應龍反水西安疆臣奉調赴討奪落濛關有功被

賞播州平改設遵義府至天啓元年永寧宣撫使奢崇
明與子奢寅復作亂陷遵義冬十月遂圍成都左布政
使朱燮元城守敗之二年春圍解擢燮元為巡撫遵義
復而再陷先是安疆臣死弟堯臣襲至是堯臣亦死妻
奢社輝永寧女也生子安位幼土目安邦彥挾之反四
十八馬頭皆應之兩省羽書交至徵兵於雲南巡撫沈
倣炌調閩省土兵於曲靖以副使黃似華監紀分道赴
援都司楊明廷將三千人援蜀烏撒土酋安効良先與

邦彥通陷烏撒衛殺指揮管良相明廷兵至畢節効良
伏兵阻截明廷戰敗死之叅將尹啓易等奔回霑益水
西賊圍普定安南兩衛都司李天常率兵四千救之賊
將羅應奎偽降誘至疊水舖伏發全軍沒報至雲南大
震霑益土婦設科及土目補鮮柰科李賢期曲等俱叛
霑益倘塘松林炎方交水白水六站堡俱不守併陷平
彝衛殺官吏武定彝目張世臣糾小東川彝賊千餘攻
陷他頗補知二堡沈倣炌以便宜起叅將李思忠督兵

守武定添設武尋遊擊倘甸守備其霑平喬甸守備俱
改遊擊張世臣攻武定思忠與戰大敗之世臣遁東川
土酋祿千鍾復反與霑撒土賊合攻嵩明知州王育德
率軍民固守倣炌便宜起叅將袁善督守備金為貴土
司沙源等馳救擊走之沙源者安南土長官司也先是
萬曆三十八年源以王弄土人斬賊有功襲本司阿氏
副長官舊職四十八年建水州土酋刀春琪構引交趾
入犯攻破五邦等地源率衆堵截勝之斬交趾偽封勝

智侯阮文美等三人因復畀以安南司地令阻截交趾
至是與寧州祿永命阿迷普明聲石屏龍在田武定吾
必奎等俱以巡撫檄調率土兵從征力戰皆有功而源
為最未幾交岡犯竜左哨源歸救復破走之以功陞宣
撫使霑益土婦設科等入陸涼州境焚劫各鄉知州郭
俊義戰敗被殺叅將尹啓易守備李加培周嘉映自交
水督兵進霑益安効良率水烏賊至霑拒戰官兵陷沒
加培嘉映俱戰死七月亦佐營長安應龍引賊補鮓等

陷亦佐縣八月攻越州衛九月圍羅平州水西賊宋萬化據龍里安邦彥自統羣苗圍貴陽自春至冬援兵俱阻龍里不得進總兵楊愈懋推官郭象乾戰江門白杆營死之巡撫李標巡按史永安等協力守禦十一月新撫王三善至平越集諸路兵分道前進十二月抵新添力戰破賊五日入龍里安邦彥退屯龍洞官兵乘勝奮擊大敗之是時黔省被圍幾十月城旦夕破王三善親冒矢石以二萬人破賊十萬抵城下官民歡呼相慶啓

門迎入城三善曰賊兵不遠軍心未定吾不可即安遂
營於南門外未幾湖南廣西四川兵大集殘破之後糧
糗不支遂議深入分屯陸廣鴨池間三年正月安邦彥
攻陸廣官軍失利退屯威清王三善收兵入城夏四月
安邦彥復糾宋萬化等來攻三善遣兵邀擊於龍里定
番青巖等處屢捷擒宋萬化諸蠻多降邦彥退守陸廣
鴨池諸要道當時川撫朱燮元亦屢敗奢崇明兵遵義
永寧俱收復五月川兵發永寧連克紅崕天台二寨遂

破蘭州焚其巢穴奢崇明父子計窮因入水西投邦彥
自黔蜀之亂雲南道阻已三年烏程閔洪學由福建左
布政擢滇撫取道廣南入滇分遣漢土官兵攻羅平復
之捕獲安應龍妻子應龍走霑益官兵東出援黔解安
南衛之圍斬首三百餘級收復新興普安等城亦資孔
等站又遣吾必奎收復炎方松林霑益倘塘四站東北
兩路俱通賊首設科李賢張世臣等已誅檄烏撒安効
良擒獻安應龍以自贖効良持兩端見水西勢衰陽為

恭順遂以應龍首及烏撒衛各印來獻勞其使而歸之
四年正月黔撫王三善為逆黨陳其愚所詐被害於大
方道中先是三善屢破賊深入水西奢社輝安位焚舊
巢竄火灼堡安邦彥逃入織金川兵亦進龍場擒奢崇
明妻安氏等安位母子遣漢把劉光祚赴鎮遠總督楊
述中乞降述中許之令擒奢崇明及其子奢寅以贖罪
王三善駐大方久安邦彥遣其黨陳其愚詐降三善信
之多與謀軍事其愚悉以報邦彥至是三善由大方回

貴州其愚隨之忽報山後有賊三善駐馬回視其愚故縱轡衝三善墜地三善知其變呼持印者先行即拔刀自刎諸苗蜂擁至取其首而去副將秦民屏亦被殺事聞楊述中回籍聽勘以川撫朱燮元代之陳其愚後為巡按傅宗龍所誅宗龍昆明人與燮元俱以戰功顯秩七月總兵魯欽劉超等敗於織金賊勢復熾烏撒安効良前遣獻印使回至曲靖為盜所殺効良遂以為辭糾合邦彥崇明等共為三十九營以五年二月直抵霑益

副總兵袁善土宣撫使沙源等力戰五日夜却之五月
復至南攻馬龍袁善等督兵大戰復敗之賊由尋甸遁
回假道東川東川奉巡撫檄以木塞路不與通有阿遣
馬頭竜戈資者為之鄉導從山路遁歸烏撒事平重搗
東川購獲竜戈資誅之六年春水西苗老虎阿引等殺
奢寅來降二月安邦彥復寇貴州魯欽戰敗死巡撫王
城巡按傅宗龍遣都司張雲鵬拒戰於趙官堡敗賊總
督朱燮元以父喪歸加偏沅巡撫閔夢得為楚蜀粵滇

黔五省總督七年參將楊明輝奉命宣諭安位令獻首
惡為安邦彥所殺崇禎元年復起朱燮元督五省兵討
賊初燮元議討水西之策宜使滇兵出霑益遏安効良
應援而別布天生橋尋甸等處以絕其走路蜀兵臨畢
節扼其交通四裔之道而別出龍場巖後以奪其險黔
兵由普定渡思臘河徑趨巢穴而陸廣鴨池分搗其虛
粵兵出泗城策應大軍由遵義鼓行而前尋以憂去未
及用閔夢得代之亦以貴州抵大方路險賊惟恃畢節

一道外通用兵宜從永寧始自永寧而普市而摩泥而赤水百五十里皆坦途赤水有城可守結營於此漸進漸逼四十里為白巖六十里為層臺又六十里為畢節畢節至大方不及六十里賊必併力來禦以重兵扼其四走路然後遵義貴陽尅期並進賊可盡矣亦不果行至燮元再任乃檄滇兵下烏撒蜀兵出永寧畢節扼其各路要害而親統大師駐陸廣逼大方八月奢崇明自稱大梁王安邦彥自稱四裔大長老其下歹費阿鮑等

各號元帥悉力趨永寧先犯赤水燬元授意守將許成名佯敗引之深入度賊已抵永寧分遣林兆鼎從三岔入王國禎從陸廣入劉養鯤從遵義入邦彥分兵四應力不支羅乾象復以奇兵繞出其背急擊之崇明邦彥皆被創漢兵斬其首獻燬元騰檄安位許其來歸位惶恐不敢出燬元督諸將屯據要隘四面迭攻日馳騁百餘里或斬樵牧或焚積聚暮還歸屯賊不能測凡百餘日得首功萬餘生口數萬每獲鄉道輒發窖粟就食賊

饑甚遂降燮元與約四事一貶爵一削水外六目之地
一獻殺王巡撫者首一開異節等驛路位皆俯首聽命
因疏請撫定焉十年安位死子幼乃分其地以授渠長
俾力分而易制燮元前後在西南二十餘年諸蠻畏服
三省亂而復治至今人頌其功不衰云

普吾沙亂滇

普明聲阿迷州土人也初為馬者哨哨頭水烏之亂與
沙源吾必奎等俱奉調率兵破賊有功既而京營御史

傅宗龍受命按黔間道由建昌回滇募兵赴任知明聲
勇黠所部土兵亦強特請隨行滇撫閔洪學入奏嘗言
自明聲東行滇土司兵益弱其為時所重如此明聲在
黔屢破水西賊衆會宗龍以內艱歸水西隨就撫明聲
亦回得授阿迷土知州日益驕蹇崇禎五年巡按趙洪
範至臨安明聲率兵迓之戈甲旗幟列數里洪範惡之
貽書撫軍王伉謂其養癰伉亦習聞明聲不法遂列奏
請檄調黔蜀兵會討焉是年冬三省漢土兵俱集以黔

鎮商士傑掌兵政伉自出臨安督糧右布政使周士昌
監軍擊明聲敗之進圍阿迷明聲使其下偽約降陰使
人以重賄誘吾必奎曰君不聞孤死兔悲之言乎阿迷
平兵行及元謀矣既而官軍與賊戰必奎賣陣先走官
軍大敗事聞大司馬熊明遇以起釁為伉罪遂與洪範
俱被逮士昌歿於陣明聲雖戰勝仍巧詞乞撫當道懲
前事不復致討總督朱燮元自黔至以兵威撫定焉相
傳廣西郡守張繼孟奉委撫明聲思以計殺之每稱明

聲才武且有功不以摧毀以致變亂皆有司之過也明
聲聞之喜一日繼孟將謁兵備道於臨安先誠其下必
取途阿迷見明聲將至故熟睡輿中其下不得請醒而
問所次已踰其境數里矣佯怒責其從行者且曰我有
事須急至臨郡徃返恐後期可沿途置騎俟我我今回
見普公遂盡屏輿蓋先行獨與從者馳數騎趨阿迷明
聲先已有人偵繼孟聞其言益大喜出迎謁語甚歡方
持茶餉客繼孟戲曰嘗聞南中土司善藥人我不敢飲

明聲驚遽指天誓曰方德公無以報何有此公果疑明聲請先飲竟易盞飲之不知繼孟執茶時已預藏毒藥手中置茶內矣明聲留治饌辭以有事謁兵備急俟回當痛飲明聲已聞其途中言信以為實因別去繼孟即疾馳易數馬即夕達臨安明聲藥發始覺命其黨率兵追之不能及予理永昌永昌孝廉方一鑑徃時曾為阿迷守親為予述其事而石屏塗玉輅昆明虞虞山咸謂明聲實以淫縱得疾死非中藥云明聲死其妻萬氏江

右寄籍人女也狡而淫據其衆役使諸小彝選部下壯而美者更番入侍沙源諸子定海定洲如琦等皆與之私既久覺無以服人乃招定海為贊婿已復嫌其樸陋而定洲少年白皙更竊殺定海而贊定洲其子普服達心耻之與萬氏分寨而居後服達以病死定洲遂無有安南阿迷之衆併近尋地愈廣南至交岡甲申張獻忠陷蜀雲南震恐使叅將李大贊率兵防金沙江吾必奎者其先為元謀土知縣久絕不嗣矣至必奎以戰功得

官仍居故地自阿迷賣陣後桀驁日甚大贊貪墨屢以
事侵之乙酉八月必奎聚衆反連陷武定祿豐楚雄諸
郡縣黔國公沐天波檄各土司兵會勦十月官軍與土
官祿永命龍在田等擊敗必奎擒之永命寧州土知州
在田石屏州土人也俱以水烏之亂有戰功在田歷級
副將崇禎十一年奉調至襄陽隸總理熊文燦軍前擊
流賊革里眼射塌天子雙溝敗之以是知名張獻忠等
受撫穀城頗與之密既而獻忠叛文燦獲罪在田亦罷

歸元謀之役與永命俱在行十一月沙定洲兵亦至時
必奎已伏誅定洲猶畱城外不肯歸會奸人饒希之余
錫朋等通驕天波金寶無以償以貿易往來各土司營
中誇天波家饒富定洲心動陰結都司阮韻嘉張國用
袁士宏等為內應以十二月朔入城辭行天波以家忌
未出見定洲入門大呼其下蜂起焚劫天波由小竇出
西城時祿永命在省方巷戰拒賊從官周鴻止天波畱
討賊天波疑鴻見誘殺之遂走楚雄其母陳氏妻焦氏

亦走城北普吉村之金井巷當夜舉火自焚死定洲因
盡得沐氏所有盤踞省城劫巡撫吳兆元為題請代天
波鎮滇又至祿豐執家居大學士王錫袞置貢院督之
與兆元傳檄各郡縣龍在田在安寧與祿永命等各引
所部歸萬氏在阿迷聞變驚曰吾家嘗為此賊敗矣謀
至省執定洲以投誠既至見定洲氣燄赫然資用饒洽
更喜過望夫婦坐八人輿持刺與撫按往來欣然自得
也沐天波至楚雄定洲率衆追之是時楚雄新為吾必

奎所破金滄道副使楊畏知奉調監軍至楚楚人留之
畏知遂駐楚間定洲西出與天波計守禦之具未集曰
公在楚賊以全力聚攻城必破公不如西走永昌使楚
得為備賊即西追恐楚塞其後留攻楚又恐公從西來
首尾牽制上策也天波從之定洲至楚雄城閉不得入
為畏知所給遂去遣其黨王朔李日芳等分攻大理蒙
化陷之屠殺以萬計畏知乘間撤城外居民盡入城清
四野築隍陴檄調漢土兵馬郡縣多遙應之其明年丙

成定洲恐畏知截其歸路又聞迤東祿永命龍在田等各自守固不敢至永昌撤兵回竭力攻楚雄楚雄守具既集屢攻不能下一日畏知坐城樓賊發巨礮擊之烟燄所指正罩畏知賊相慶謂必死須臾烟散畏知端坐如故惟擊去左幘耳因驚歎以為神畏知視賊懈輒出奇兵奮擊前後所殺甚夥至夏賊稍稍引去東攻石屏石屏守亦堅復回攻寧州破之永命死至嶍峨土官王克猷走死於路龍在田在石屏懼與其黨許明臣竄大

理定洲既定迤東復引而西攻楚雄分兵為七十二營每七營各為一大營統之環城北濠為久困計畏知守益堅終不能入又明年丁亥張獻忠被誅於西充其義男孫可望等率殘兵由遵義入黔龍在田使人告變且勸其至滇可望因詐稱黔國焦夫人弟率兵來復仇雲南初苦沙亂皆延頸望其來不知為賊也三月可望等至滇定洲解楚雄之圍率衆禦於革泥關大敗遁歸阿迷可望破曲靖及交水俱屠之遂由陸涼宜良入省宜

良知縣方興佐率衆持羊酒迎可望賊喜不入城至省
巡撫吳兆元等迎於郊巡按羅國瓛在曲靖被執不從
帶至省自焚於署前通判朱壽琳以僉都御史奉差募
兵於滇亦不屈從容賦絕命詩被殺可望等因盡據城
池官署布列以居法禁苛切百姓失業流離視昔較甚
矣既而分遣李定國徇迤東諸郡可望自率兵西出揚
畏知禦於啓明橋兵敗被執可望聞其名不殺誘降之
曰吾今已不為賊當與爾共扶明耳畏知曰果爾當從

吾三事一不用獻忠為號二不殺百姓三不擄婦女可
望皆許之即折箭對誓迤西得免屠戮畏知之力也可
望至大理龍在田許名臣迎降之復以書諭沐天波如
與畏知言天波遣子報命永昌通判劉廷標上杭人推
官王運開夾江人俱不屈自縊死可望分兵入麗江悉
取其數代所畜厚待天波子陰使劉文秀隨之疾馳度
蘭津橋至永昌會天波與鄉官龔尋等於北城樓遂携
之同楊畏知等俱至省姚安舉人席上珍拒賊見執至

省被磔甚慘李定國至臨安臨安為定洲部目李阿楚赴駐守拒戰甚力定國穴地道置炮炮發而城陷阿楚赴火死兵猶巷戰定國怒執城中紳衿兵民盡戮之於城外白場所殺七萬八千餘人而陣亡與自焚自縊者不與焉初意遂襲阿迷蒙自取定洲聞晉寧有變因盡掠臨安子女而回過河西在籍巡撫都御史耿廷錄赴水死其妻楊氏被執亦不屈見殺至晉寧圍之屠其城并屠昆陽呈貢歸化所殺又數十萬人先是昆陽有孔師

程者以從軍得官糾合晉寧各城人拒賊定國既至師
程入舟遜去晉寧知州石阡冷陽春呈貢知縣嘉興夏
祖訓俱死之定國又盡殺臨安被獲婦女於路亦千餘
人江川知縣周柔強不迎定國率衆屯於撫仙湖中之
孤山定國既至省使人出擊盡殲之蓋迤東屠戮之慘
幾與蜀省同而迤西獨免宜楚雄人至今尸祝楊畏知
不衰也然城亡與亡大節不奪如冷陽春諸人亦何可
多得哉可望定國既俱回省經營土木毀南城民居萬

間築演武場城內置四王府磚石毀呈貢昆陽二城為之可望文秀定國與艾能奇皆僭稱王在籍御史任僎等又倡議尊可望為國主可望遂置六部等官以僎兼吏禮二部尚書鑄興朝通寶錢括近省田地及鹽井之利俱以官四民六分收取各郡縣工技悉歸營伍以備軍資可望饒機智既據有全滇益自尊大而其黨猶儕視之李定國尤崛強每事相阻忤明年戊子可望與劉文秀等議縛定國於演武場聲其罪杖之百既復相與

抱持而哭命定國取沙定洲以贖罪定國心憾之念相推奉已久無能與抗也初定洲歸屯兵潤草竜與萬氏分險自守其下湯嘉賓陳長命等各據一山立營相去數十里爲犄角之勢私通交趾借其援以固諸蠻心一日偶集於嘉賓營定國偵得之率兵遽至圍以木城困守三閱月絕其水源諸蠻懼出降者相續遂械定洲等數百人回省剥其皮於是沐天波具衣冠謝雪祖宗母弟妻子之讐滇人之被沙毒者亦咸以為快焉

滇考卷下